

東
華
續
錄

東華續錄

同治三十四

臣王先謙敬編

臣張式恭恭校

五月庚子朔諭議政王軍機大臣等喬松年奏皖北布置防守情形一摺髮捻屬聚楚地聲言回救金陵若由楚東竄皖北則六安首當其衝見在駐守六安有道員蔣凝學六營喬松年復派總兵王才秀帶所部一千五百人駐守三河尖爲六安接應並飭駐紮正陽關之總兵朱淮森整頓聽調其壽州定遠等處亦皆有營防守所籌尙屬妥協惟髮捻股數眾多見在楚省德安雲夢應城隨州京山天門等處縱橫數百里徧地皆賊而皖北防兵究嫌單薄恐不足以資堵禦陳國瑞一軍前據吳棠奏業已拔營前赴徐州聽候僧格林沁調赴臨淮此時賊雖未入皖疆而軍情旦夕變遷

逆迹剽悍尤宜先爲籌畫以備不虞著僧格林沁卽飭該提督一軍擇要駐紮或卽調赴臨淮如賊勢東趨卽行馳往援應以資扼截毋稍疏虞本日據穆圖善奏已飭常星阿六起馬隊徑赴僧格林沁軍營聽候調遣此軍到後著該大臣妥爲調度飭令與前敵馬步各軍迅將楚豫交界之賊四面圍剿毋任東竄並遵前旨酌撥馬隊數百名赴喬松年軍營喬松年卽將克蒙額馬隊騰出飭赴揚州聽富明阿調用喬松年另片奏李世忠所散勇丁歸農者不少亦有游手之人誠恐流而爲盜等語滁全天來等處甫經交出該地方久爲李世忠盤踞官民不相聯屬歷有年所此時控馭撫字及一切善後事宜至關緊要喬松年身任皖撫責無旁貸務卽飭令各該地方官妥爲整頓撫綏善類驅逐匪徒毋使無業游民復行嘯聚滋事以靖地方其署滁州知州闕平相在任有年旣

無裨益卽著另選賢員接署以資治理將此由六百里各諭令知之○諭徐宗幹奏髮逆竄入閩省建甯縣城被陷旋復見派司道大員出省督剿一摺另片奏林文察卽日內渡並催曾玉明回省各等語此次髮逆由江西竄入建甯縣境署都司佟慶帶兵堵截力戰陣亡而該縣文武員弁乃以分駐關隘爲詞置城守於不顧以致賊氛一至城卽被陷賊去之後又捏報克復以爲請獎地步種種畏葸粉飾甚屬可惡乃徐宗幹並不實力查辦輒據屬員稟報之詞含混入奏封疆大吏辦事如此顛預安望其整飭戎行綏靖疆圉耶著傳旨嚴行申飭所請將已革參將吳連陞開復原官並克復縣城出力文武存記彙獎之處著不准行其失守地方之文武員弁並著徐宗幹查明有無聞警逃避情形從嚴參辦至各該員等分駐關隘一節何以先期並不稟報迨至縣城失守始藉

口於此希圖卸罪徐宗幹務當認真查出按律懲辦並著左宗棠查明如有前項情節即將各該員弁嚴行參辦該逆既有分股由汀回粵之說甯化歸化一帶防務喫重該撫當嚴飭在防員弁實力堵剿不可再有貽誤自干重咎此次所派之道員張啟煊從前帶兵甚不得力徐曉峰在皖營時屢次被人參奏徐宗幹於該二員何以如此信任仍著隨時察看如始終不知奮勉卽著另遴安員接統其軍毋令債事左宗棠前奏請飭林文察內渡剿賊令康國器由浙入閩會合張運蘭粵師夾擊曾諭令該督等照辦見在賊氛正熾左宗棠務當妥籌兼顧儻張啟煊徐曉峰等不甚可靠著左宗棠另行選擇知兵之員酌量改派徐宗幹當恪遵前旨迅速催提林文察康國器兩軍剋日馳赴延邵一帶迎頭痛剿毋令蔓延腹地不可收拾將此由六百里各諭令知之○諭穆圖善奏

遵派馬步官軍援楚見已啟程並請飭河南備辦糧草等項各摺
片陝省援楚官軍經穆圖善派撥藍斯明蕭河清步隊作爲頭起
姜玉順步隊作爲二起剋日陸續前進均歸官文調遣常星阿等
六起馬隊徑赴僧格林沁軍營姜玉順一軍已於四月十七日啟
程其藍斯明蕭河清並常星阿等軍究於何日啟程未據穆圖善
聲敘著該將軍卽飭藍斯明等馬步各隊迅速分赴僧格林沁官
文軍營不得稍事延緩見在分撥楚豫各營兵勇爲數已不爲少
甘省兵力尙單不敷攻剿且刻下甘省回氛尤熾亟應移緩就急
昨據雷正綰請調陝營兵勇助剿著穆圖善卽於所部之見存十
營內撥數千飭令迅赴甘省聽候雷正綰調撥毋得藉詞推諉西
蒙克西克兩起馬隊並陳天佑所統東治兩營均於十六七兩日
拔隊赴定邊堵剿著都興阿於此起兵勇到時妥爲布置其金順

所部馬隊四百名經穆圖善派令赴省以補西蒙克西克之缺惟
西安省垣見已安堵如常毋須多兵防守所有金順馬隊仍著穆
圖善飭令前赴都興阿軍營其前往定邊之各營馬隊應需軍火
糧餉卽著劉蓉飭令陝西糧臺按月支領至蕭河清等援楚兵勇
應從豫省地方經過見已由穆圖善糧臺備銀數千兩帶赴河南
一帶會同經過州縣豫行備辦尙恐價值不敷著張之萬速飭河
南一帶州縣設法墊辦准其作正開銷卽在該省欠解協濟穆圖
善軍營餉下劃扣歸款穆圖善俟分撥各營事竣著剋日啟程赴
楚官文俟穆圖善到後妥商調度務當力遏賊匪東竄皖疆之路
就地殲除毋任蔓延將此由六百里各諭令知之○諭勞崇光等
奏官軍追剿何二逆股獲勝清鎮解圍長寨等城被陷卽復下游
各屬剿匪疊勝各摺片開州逆匪何二糾黨復圍清鎮縣城經林

自清等軍認真守禦城圍立解賊仍向開州遁去其被匪竄擾之
定番底順長寨等城亦經趙德昌等先後收復卽著勞崇光張亮
基嚴督派出各軍乘勝進攻由朱昌堡五里橋等處跟蹤追剿務
將此股賊匪聚殲毋畱餘孽下游之龍泉湄潭並石阡府清江廳
思州府等屬之匪雖經官軍疊獲勝仗惟該逆並未殲除淨盡亟
應分投剿洗以期早就肅清著卽檄飭各路官軍實力掃除爲一
鼓蕩平之計獨山州屬之已賴旁寨等處賊匪恃險負隅必須厚
集兵力方足以資攻剿所有全祖凱姚華勝所部兵練四千餘名
卽著該督撫飭令帶往獨山荔波分界處所會同楊廷桂等分投
剿辦並催周洪印等軍由黎平古州一路跟追以收夾擊之效另
片奏林自清隨同官軍剿匪所向有功實堪嘉尙著俟該員起病
後准其以原官酌量簡用以示鼓勵將此由六百里各諭令知之

○辛丑諭議政王軍機大臣等前據御史周恆祺奏稱奉天省吏治民風漸不如前宜籌豫防之策一摺當交寶珣查明具奏茲據寶珣查明先將辦理大概情形覆奏據稱奉省積案之多由於奏交咨交及省控各案均委治中糧廳承德縣三處審辦該員等本任政務已屬殷繁不免顧此失彼是以愈積愈多見擬另設臬局擇候補中聽斷優長者分案審理並擬將委審各員分別獎懲又州縣界址遼闊捕役無多營兵數少捕務難望起色擬令旗署捷捕營兵與地方有司聯絡聲勢相輔而行又擬揀調各省廉能各員並陳明州縣政績候旨升用等語所籌尙屬周妥所有設立臬局獎懲委審各員及派委旗兵捕盜各條均著照所議辦理其揀員籌餉統兵督緝章程卽著玉明寶珣德椿妥速定議具奏至捕役及捕盜營兵丁素與盜匪暗通聲氣尤當責成營員及地方官

隨時訪察若因兵役爲數無多建議增添恐其中愈多流弊不可不詳加斟酌至所請於各省州縣中著名廉能各員內揀調四員飭發奉省補用之處著俟該將軍等奏到時再降諭旨其所稱於州縣歷任三年據其政績事實陳明候旨錄用並不得列入保舉案內以杜瞻徇冒濫一節亦著照所請行惟立法固期周密而致治尤在得人奉省吏治捕務廢弛已極非力加整頓不足以除積習而挽頽風玉明等務當振刷精神實力奉行總期吏治捕務日有起色方爲不負委任儻有名無實僅以更定章程一奏塞責致地方事務益形廢弛恐該將軍等不能當此重咎也將此各諭令知之○飭四川山東山西河南各籌撥甘餉三十萬兩○壬寅諭內閣奎棟奏葉爾羌參贊大臣景廉於正月初四日啟程進口就醫順道回旗等語覽奏實堪詫異前據常清奏景廉因病咨請開

缺當經降旨賞假一箇月調理毋庸開缺並據景廉自行陳請開缺亦經批示賞假調理景廉如果病勢沉重亦應再行具摺陳請靜候諭旨遵行乃於發摺後迫不及待徑自交卸啟程進口殊屬輕率景廉著傳旨嚴行申飭卽著無論行抵何處迅速折回葉爾羌本任毋得任意遷延致干重咎○癸卯諭議政王軍機大臣等馮子材等奏分兵戍守金壇丹陽各城並請分撥兵勇一摺丹陽攻克之後經馮子材等派出將弁將潰賊捕斬殆盡張文德見在駐守金壇陶茂林見在防守丹陽著卽飭令該總兵等統領在防將士嚴密梭巡查拏土匪與句容東壩等處防兵聯絡聲援嚴扼上游竄賊毋稍疏懈所稱鎮防兵勇除畱戍鎮江丹陽金壇三城外尙可抽出四千名或派往江皖各省或分起遣撤等語見在髮逆麇聚楚疆時思東竄皖北防兵究嫌單薄此項兵勇四千名著

曾國藩喬松年酌量情形如可得力卽咨行馮子材等調往臨淮
歸喬松年調遣以資防剿如體察皖北情形無須添兵此項兵勇
卽可不必調往著一面奏聞一面咨會馮子材等分兵妥爲遣撤
以節糜費將此由五百里各諭令知之○諭慶昫奏接奉二月寄
諭並近日防守情形一摺據稱甯夏滿城被圍日久聞派訥欽往
援人情欣盼近日賊數已減賊情亦渙聞有援軍倉皇情形畢露
等語自尙未知簡派都興阿督辦甘肅軍務進援甯夏之旨甯夏
情形雖較前稍鬆而賊未解圍而去必尙爲困獸之鬬著都興阿
仍遵前旨由定邊一路前進並先挑勁兵一千名疾趨甯夏迅解
城圍該將軍大兵繼進卽酌度情形或分兵越花馬池而西逼近
黃河駐紮扼賊東竄此股賊匪已成強弩之末該將軍先聲所到
賊膽早寒必能立奏膚功保全合城生命慶昫常陞所籌勸辦各

節均尙周密著就見有兵力實力防守並探明援軍已至何處約期夾擊熙麟卽飭趙延烺羅元勳等兵勇進援甯夏訥欽之兵已到何處悉歸都興阿節制都興阿軍火由慶陽糧臺支發雷正綰餉需著劉蓉隨時籌解不得延誤平涼援賊已盡諒可卽日得手著雷正綰催督各兵一鼓攻拔以便騰出兵力節節掃蕩慶陽需餉甚殷沈桂芬遵照昨日諭旨速解三十萬兩赴慶陽糧臺並將晉省所製炸礮火箭等項酌量解赴都興阿軍營以資利用將此由六百里各諭令知之○以捐備京倉採米經費賞還已革江南河道總督潘錫恩原銜○甲辰曾國藩奏丹陽一城經富明阿馮子材會師攻復後僞潁王僞甘王等巨酋糾敗賊三四萬眾圖犯東壩並分股圖犯高潛四月十三日水師營官柳壽田迎擊於固城湖敗之高潛守將蕭信集等追擊於楊村又敗之賊遁回漆橋

時鮑超正欲馳諭譚勝達率東壩各營先剿大山頭一股仍親督騎隊專剿漆橋一股詎行抵漆橋賊已合股併向東壩一路十四日譚勝達商之吳雲集等軍募食出隊師次安興該逆迎面撲來諸將士奮勇直前節節掃蕩甘逆顛逆率悍黨正在高岡督陣不料我軍猝至賊眾大潰悉向湖州廣德竄去是役斃賊約七千人中有僞王等十七人查丹陽各賊股意在衝出東壩由皖南併竄江西經鮑超飭令譚勝達等督軍痛剿雖未能悉數剪除而下游多殺一賊卽上游少竄一賊見在鮑超卽日上援江西臣已撥餉銀十萬兩交鮑超冀速師行此次出力員弁仍請附入東壩句容各案內彙保優獎其陣亡之副將張遇春等請旨飭部各照本職本銜從優議卹又奏據報徽州南路有賊詢其酋目爲僞烈王林逆僞麟王朱逆及僞爵潘忠義李石黃棕保等究其來路蓋江陰

楊庫之敗賊常州城外之壘賊由丹陽等處上竄從昌化關入歙境距郡城三四十里四月初十日徽郡守將唐義訓率所部六營馳出城南爲迎頭截勦之計是夜唐義訓以一營伏鍾塘嶺後十一日以五營進遇賊接戰伏軍並發殲其前鋒金國琛毛有銘會帶馬步十二營行抵富塢隔河屯紮傳餐未畢賊以大股屬至我軍猛撲猛進更以騎卒沿隄包鈔唐義訓適從鍾塘嶺尾賊而至兩面夾攻俘斬千餘人解散不可以數計逸出之賊遁向黃山小路復於十二日爲唐義訓所敗賊旣趨重黃山則歛休之北夥縣之東均形喫重十三日我軍馳抵五弓橋賊已揚旗而來唐義訓揮令各營從溪河上流大呼衝入斬馘無算十四日金國琛毛有銘等亦率各營自五弓橋疾進聲威大震羣賊驚亂不復成伍奪路狂奔生擒林義等十酋陣斬潘忠義等十四酋死者散者實有

二萬餘眾敗殘零賊潛向上溪口南竄不過二三千人婦女輜重馬匹器械拋棄略盡此次續竄股匪經各軍拏斬解散約去十分之八入江之匪無幾軍威爲之一振在事出力員弁可否容臣酌量保獎之處出自聖裁又奏蘇浙羣賊由徽上竄者約分六起第一起爲僞涪王等係溧陽宜興敗出者見尙踞江西之南豐縣城暨分竄汀州等處第二起爲陳炳汶汪海洋等係杭州敗出者見尙延蔓於鉛山之湖坊陳坊等處第三起爲僞侍王來自湖州由徽入江攻陷弋陽四月十六七等日圍撲撫州旋退至金谿之許灣將與南豐股匪合爲一路第四起爲江陰楊厓之敗賊常州城外之壘賊卽唐義訓金國琛等軍十三日在歙休境內所破者也其金壇句容敗出之賊是否在內尙未可知常州克城之時各頭目與兩粵老賊均就駢誅無一漏網不至貽患上游至丹陽逸

出之賊雖在東壩一敗餘黨悉趨廣德湖州是將爲第五起湖州堵輔二悍酋徒黨尙眾又將爲第六起無不圖竄徽境併犯江西目下賊情以江西爲最重而江西之待援實比皖北爲尤急鮑超全隊四月必可成行五月當可到江自不宜改援皖北致負江西軍民雲霓之望至周寬世金國琛兩軍見因侍逆南竄已遠卽調駐祁門漁亭休甯等處以備迎堵續至之賊俟丹陽湖州廣德各股竄盡再行馳入江西會剿 上諭議政王軍機大臣等丹陽敗賊意在衝出東壩由皖南併竄江西經鮑超等督軍痛剿大挫兇鋒江陰等處敗賊續竄徽郡者亦經唐義訓金國琛毛有銘等於鍾塘嶺五弓橋一帶疊獲大勝擒斬解散約去十分之八剿辦甚屬可嘉出力員弁卽著曾國藩酌量保奏候旨施恩蘇浙羣賊由徽上竄約分六股第一起僞涪王等尙踞南豐並分竄汀州等處

第二起

陳炳汶汪海洋等延蔓於鉛山境內第三起僞侍王攻陷

弋陽退至金谿將與南豐一股會合第四起股匪雖經唐義訓等所破而丹陽逸賊悉趨廣德湖州其湖郡之堵輔二悍酋亦將接踵併犯江西是日下軍情江西之待援比皖北爲尤急曾國藩調周寬世金國琛兩軍分駐祁門漁亭等處迎堵續至之賊而檄鮑超全隊上援江西並撥餉銀十萬以速師行斟酌緩急甚合機宜卽著飭令鮑超剋日拔隊援江毋稍延緩楊岳斌督辦江西皖南軍務責無旁貸卽著懷遵前旨迅赴江皖交界扼要處所居中駐紮督率諸軍會同劉典力圖掃蕩沈葆楨督飭江右諸軍實力防堵並將南豐攻拔盡殲踞賊毋令旁竄曾國藩力疾強起照常治事具見公忠體國之忱此時上游髮捻圖援金陵而金陵圍師與江西羣賊亦均在危疑震撼之際軍事方殷非該大臣督率調度

不能竟此全局也將此由六百里各諭令知之○諭官文奏官軍追剿獲勝下游情形喫緊派兵分剿請截畱英毅湘果各營各摺片隨州賊匪盤踞八里畝經總兵楊朝林擊敗逃竄馬平港僧格林沁馬隊馳往應山楊朝林移營德安總兵梁洪勝將棗陽南竄之賊擊敗於安郡曰口永澧河等處並將圍逼天門縣城及竄擾阜市之另股各匪擊退見在天門應城德安等處賊勢甚重其擊敗之賊復回竄隨州之南山官文見咨商僧格林沁駐軍德安會軍夾擊著僧格林沁卽酌量情形移軍前往四面兜剿並分兵繞出賊前力遏賊匪東竄之路總期就地殲除毋令闖入皖境武昌省城防守事宜卽著唐訓方嚴密布置不可稍涉大意前據穆圖善奏派藍斯明姜玉順蕭河清等步隊剋日啟程此時已行抵鄂境僧格林沁見調蕭河清一軍赴該大臣軍營著卽飭令該總兵

前往聽候調遣其餘步隊各軍應分隸何路著僧格林沁官文會商調度常星阿所統馬隊俟到鄂後卽著歸僧格林沁調遣前據嚴樹森奏請將陝西所派英毅等二十營撤回當因英毅六營已入楚境應否畱楚諭令官文知照劉蓉辦理見據官文奏稱賊蹤去勢較遠陝軍勢成尾追不能繞前迎擊應需餉糈亦難籌給著官文劉蓉卽檄令此軍無論行抵何處迅卽撤回陝境其李雲麟所統湘果等十四營前經劉蓉議令暫緩撤遣本未令其畱楚著劉蓉仍遵前旨責令在陝南搜捕餘匪毋庸飭令赴楚所有英毅六營勇丁應否畱防陝境或飭令赴援甘省及酌量裁撤之處著劉蓉酌量辦理將此由六百里諭知僧格林沁官文劉蓉並傳諭唐訓方知之○予江南陣亡副將張遇春等祭葬世職○乙巳諭議政王軍機大臣等富明阿奏撤回南渡各軍及水路布置情形

並催調克蒙額馬隊各摺片丹陽一城前據馮子材等奏已派陶茂森前往接守見在髮捻麤聚楚境天門應城德安等處賊勢甚重該逆不能南竄勢必東趨是江皖各境之防關繫尤爲緊要富明阿前畱守丹邑之楊心純五營並詹啟綸所部五千人卽著全數撤回分籌布置以資扼守該將軍擬派副將劉成元等營馳防天長等處並令吳全美師船移泊瓜州以防上游竄賊所籌均尙妥協惟天六儀揚一帶皆係坦途無險可扼務當飭令各營互相犄角聯絡聲勢以防竄突並隨時與曾國藩吳棠喬松年所派分防皖北各軍聲息相通妥籌勦辦毋稍大意將此由五百里諭令知之○諭喬松年奏續報皖北情形並派兵駐守滁州等處各摺片楚北賊匪分竄信陽應山等處賊蹤飄忽靡常不可不嚴爲戒備該撫已飭臬司英翰駐守亳州以防土匪布置尙妥普承堯何

紹彩兩軍經曾國藩派令分駐廬州巢縣斷難移動鮑超一軍昨據曾國藩奏稱仍遵前旨赴江西援剿亦未能分顧皖境陳國瑞一軍該撫擬令扼紮潁六之間著卽稟商僧格林沁辦理如兵力尙單可卽將馮子材派守金壇等處所餘兵勇四千名仍遵前旨酌量調赴臨淮以資防剿滁州天長等處業經吳棠等派遊擊張從龍等帶勇前往駐紮所有善後事宜卽著該撫飭令各州縣實心經理克蒙額馬隊前有旨俟僧格林沁酌撥馬隊到臨淮後再令赴揚茲據富明阿奏此項馬隊僅存八十人畱於臨淮不能成隊若早調來揚可以合成勁旅尙屬實情所請於常星阿未到之先卽飭克蒙額管帶赴揚以資得力之處著喬松年酌量辦理將此由五百里諭令知之○諭徐宗幹奏逆匪竄陷甯化旋卽克復並分路追剿布置情形一摺江西竄匪闖入閩疆分股竄陷甯化

縣城經官軍會合鄉團壯勇馳往攻勦卽將縣城收復餘匪分擾將樂歸化建甯縣境其皖浙逆匪李侍賢等股分由徽州開化竄至上饒鉛山廣豐等境內逼近崇安浦城等縣見經徐宗幹飭令署臬司徐曉峯等駐紮延平建陽策應北路道員張啟煊駐紮泰甯援應中路道員陳維漢駐紮將樂並飛催署總兵祿魁等援應清流長汀以顧南路卽著督飭徐曉峰等軍嚴密布置相機策應惟賊蹤飄忽靡常此次竄陷甯化之匪雖經諸軍擊退並未大受懲創此後恐尙有另股逆匪陸續竄入閩境徐曉峰張啟煊等軍是否得力能否遏截兇鋒著左宗棠徐宗幹仍遵前旨隨時察看儻始終未能奮勉卽另選妥員接統其軍毋得稍有瞻徇致滋貽誤左宗棠前派援閩之康國器一軍計已啟程林文察一軍前據徐宗幹奏稱卽日由臺內渡卽著左宗棠徐宗幹迅速催提剋日

馳往延邵一帶迎頭截擊並飛提張運蘭所部卽日由粵入閩會同康國器等軍儘力兜剿毋任逆蹤紛竄腹地江西賊勢蔓延曾國藩所派之周寬世金國琛等軍前據奏稱畱紮祁門漁亭等處未卽入江卽著飛催鮑超迅率所部剋日馳援江西毋再延緩楊岳斌前經諭令馳赴江境交界駐紮督辦江西皖南軍務本日據熙麟奏衰病難支陳請開缺當經降旨允准並將楊岳斌補授陝甘總督甘省回氛甚熾亟須大員前往剿辦惟見在江皖軍務正形喫緊著楊岳斌仍遵前旨迅赴該二省適中之地擇要扼紮督率各軍會同劉典所統之師力圖埽蕩俟江皖毗境肅清卽行奏請馳赴新任其江西與閩省界連各境著沈葆楨嚴飭在防各軍與閩軍實力防剿不得稍分畛域並迅飭席寶田等將南豐攻拔盡殲醜類毋任擾及他境徐宗幹奏稱建甯甯化相繼失守雖旋

卽克復究屬防堵不力自請議處等語徐宗幹著交部議處該二縣失守地方文武各員並著左宗棠徐宗幹查明參辦毋稍寬縱將此由六百里各諭令知之○諭都興阿奏遵旨赴防行抵太原趙程前進一摺另片奏請調兵勇人員及抽撥洋槍各項等語熙麟奏通籌甘省軍務仍請派令僧格林沁督剿恩麟奏籌辦甯夏軍務情形摺片覽奏均悉都興阿行抵太原接奉寄諭刊刻木質關防著卽照辦並著督率各兵星馳前進遵照疊次諭旨迅解甯夏之圍毋稍延緩所請抽撥洋槍八百桿已諭知管理神機營王大臣照數撥解另單請調文武各員除候選道榮祿另有差委其侍衛額爾登布等四員均諭令赴甘肅軍營差委矣該將軍又以曹克忠勇敢善戰請令赴營並令劉蓉另派駐防隴邊等語曹克忠駐守汧隴一帶係爲豫防甘肅逆氛回竄秦中而設能否另派

勁旅防守抽出該總兵所部赴都興阿軍營調遣著劉蓉酌度具奏熙麟奏衰病情形並懇暫派文煜代理見辦公事本日已有旨令熙麟開缺回旗調理熙麟啟程以後所有慶陽防守及糧臺一切事務均交文煜辦理文煜係棄瑕錄用之員務須振刷精神力圖報效以副委任熙麟所請令僧格林沁督師赴甘其摺內所稱河南僅賸零匪該王見駐嵩縣自係得自傳聞均未確實河南匪勢趨重湖北且時有東竄皖疆回救金陵之意該親王駐軍信陽州責任極重斷難西行甘肅見有都興阿督辦雷正綰幫辦如果申明紀律節節勦辦無難立奏膚功也恩麟奏憑陳籌辦甯夏軍務情形並密陳辦法一片殊嫌嘵辯梁生嶽辦撫賊匪既未獻城歸順則慶昫之不再羈縻嬰城固守自屬正辦梁生嶽定安二員主撫無功是否藉以緩師意存畏葸著都興阿查明參奏恩麟另

片奏軍營鼓舞人才惟恃爵賞前奏各件或因道路羈延未據奉到或經部議駁斥未能盡准一切呼應不靈懇請於所奏事宜及保舉人員俯賜准行等語朝廷用人行政一秉大公恩麟前後所陳及保升各員亦多有奉旨俞允者他省軍營所奏亦多有奉旨駁斥者惟在權衡當否歸於至善該護督如果保舉與例相符措置悉無乖謬自當照行俾資觀感否則賞罰者天下之公器亦斷不能爲該護督曲徇也將此由六百里諭知都興阿熙麟劉蓉文燧並傳諭恩麟知之○熙麟以病免以楊岳斌爲陝甘總督由福建水督提未到任以前以西安將軍都興阿署理都興阿未到任前仍以布政使恩麟暫行護理○丙午諭內閣古今治亂得失之源聖賢身心性命之學莫備於經君臨天下者所當朝夕講求期有神於治理善倭仁賈楨選派翰林十數員將四書五經擇其切要之

言衍爲講義敷陳推闡不必拘泥排偶舊習總期言簡意賅仿照
大學衍義體例與史鑑互相發明將來纂輯成書由掌院學士裝
帙進呈以備觀覽○丁未諭內閣官文奏都統銜鑲紅旗護軍統
領舒保由湖北楊家河地方追剿紛竄髮逆斬馘甚多復於四月
二十一日分路追擊二十餘里斃賊無算直抵壽山時已薄暮層
岡深澗不利馬戰舒保見賊來甚眾直前賈勇力擣中堅與德隆
阿等陷入重圍力竭陣亡等語舒保自到湖北帶兵以來屢卻悍
寇屢復名城十餘年來戰功卓著此次因極力追賊陷陣遇害覽
奏殊深悼惜舒保著照都統陣亡例從優賜卹任內一切處分悉
予開復並加恩予諡入祀昭忠祠於湖北武昌漢陽黃州德安襄
陽建立專祠歷年戰績並著宣付史館伊子倭克吉訥侯及歲時
由該旗帶領引見候旨施恩以示篤念勲臣至意尋予祭葬世職

贈太子少保謚貞恪○諭議政王軍機大臣等官文奏護軍統領
舒保力戰陣亡並分飭鎮將遏賊東趨各摺片已明降諭旨將舒
保優卹建祠予謚並將德隆阿等一併附祀專祠矣髮捻合股闖
入楚疆雖經僧格林沁等督率馬步各隊累戰皆捷而大股麇聚
於阜市巡檢司等處擾及京山復分股一自宋河至隨州之南山
一自楊家河至德安互延二百餘里捻首牛落紅圖犯德安窺伺
黃孝其黃土關一股復由東簞店廣水驛竄至孝感縣屬之二郎
畝等處是漢江以北羣賊如毛亟宜盡力剿洗著僧格林沁官文
等遵照前旨督飭各軍四面兜剿務將下游武漢及大江北岸竄
路竭力遏截並分飭蘇克金傅振邦等繞出賊前毋令竄入皖豫
邊境光固一帶著張之萬派撥勁兵豫爲防範以備不虞英霍毗
連楚境更宜嚴密稽察國藩喬松年督率地方文武嚴密布置俾

該匪無隙可乘惟該逆等以援救金陵爲名故能號召匪徒固結不解爲今之計若將金陵迅速攻拔則該逆失所依附眾心渙散剿滅必易是攻拔金陵洵爲目前第一要務曾國荃率師合圍已經數月布置自必周妥著卽督率諸軍會合彭玉麟水軍奮勇進攻迅拔堅城以副委任金陵城內醜類尙多圍攻斷不可稍有瑕隙致令乘間出竄貽誤他省如由何處衝突而出卽惟何處統兵之員是問李鴻章所部兵勇攻城奪隘所向有功礮隊尤爲得力見在金陵功在垂成髮捻蓄意東趨遲恐掣動全局李鴻章豈能坐視著卽迅調勁旅數千及得力礮隊前赴金陵會合曾國荃圍師相機進取速奏膚功李鴻章如能親督各軍與曾國荃會商機宜剿辦更易得手著該撫酌度情形一面奏聞一面迅速辦理曾國藩身爲統帥全局在胸尤當督同李鴻章曾國荃彭玉麟和衷

共濟速竟全功埽穴擒渠同膺懋賞並著左宗棠嚴飭蔣益澧高
連陞等迅拔湖州郡城肅清全浙騰出兵力馳援江皖一帶地方
俾免蔓延貽誤江北天六等處地廣兵單該處爲裏下河一帶門
戶恐賊匪垂涎完善前諭富明阿將援剿江南之師悉數調回分
投布置見在計已到防如果賊有竄近消息而兵力尙有不敷卽
著李鴻章調派得力之兵妥籌兼顧陳國瑞一軍應令移紮何處
仍著僧格林沁酌量調派一面迅速奏聞徐宿清淮等處並著吳
棠隨時整飭加意籌防期於有備無患將此由六百里各諭令知
之○諭崇厚奏日斯巴尼亞國遣使來京請立通商條約一摺日
斯巴宜亞國使臣瑪斯呈遞照會請立條約並呈出所奉全權憑
據崇厚見令該國使臣在津候旨所有通商立約事宜卽著薛煥
崇厚與該國使臣妥爲辦理並發去全權大臣諭旨一道如該使

索取卽可照案鈔錄給予閱看俟立約事竣仍將此旨繳回將此各諭令知之○戊申諭議政王軍機大臣等穆圖善奏督軍分起赴鄂一摺據稱見在馬步各營均已先後出關該將軍定於五月初六日督隊拔營啟程等語多隆阿所部前經諭令以八千步隊赴楚如尙有餘兵撥赴甘省助剿茲據穆圖善奏多隆阿所部一萬餘人全行赴楚自未便令其折回著卽催令各軍迅速前進到後交僧格林沁官文分別調遣楚北羣盜如毛得此兵力自無難剋日奏功惟皖北地方仍形空虛該匪不能逞志於楚恐蓄意東趨由英霍以救金陵不可不慮陳國瑞曾否到潁六駐紮著僧格林沁曾國藩喬松年速爲布置並著曾國藩喬松年悉心籌畫如兵力實有未敷或函商官文酌撥楚軍或仍遵前旨撥鎮防兵勇四千人扼紮要地均須早爲籌策萬不可任令逆匪闖入致誤戎

機楚軍既由穆圖善全行帶回鄂境自未能撥赴甘省雷正綰兵力不充待援頗切劉蓉所部兵勇爲數不少著卽酌撥數營赴甘交雷正綰調遣以厚兵力蔡逆一股闌入鎮安大小心川思欲偷渡漢江前諭李雲麟追躡並令劉蓉檄蕭慶高等遏其竄路何勝必等會合邀擊近日情形若何久未據李雲麟奏報若此股逆眾迅殄亦可騰出兵力赴援甘省著劉蓉李雲麟督飭將弁速將此股殄滅勿任蔓延川陝交界地方致辦理又形棘手楚省兵力已厚官文督飭唐訓方設法寬備餉需以收飽騰之效所有劉蓉李雲麟前派追剿髮逆已入楚境各營著劉蓉李雲麟迅速檄調回陝勿令前進將此由六百里各諭令知之○己酉諭內閣歷代史書皆以帝王本紀冠諸簡端我朝 列聖相承均經國史館恭修本紀敬謹尊嚴伏念 皇考文宗顯皇帝至德鴻謨耿光大烈

業經特命開館纂修。實錄見已進呈至五年允宜恭修。本紀

垂示後昆著國史館總裁遴派提調等官督率謄錄詣。實錄館

將業已進呈之書照副本恭繕一分恪遵編纂隨時進呈於。實

錄告成後陸續辦竣所繕。實錄副本卽恭藏史館以資考證○

諭議政王軍機大臣等沈葆楨奏侍逆突犯撫州血戰解圍並弋

陽克復廣信等處擊賊情形進攻南豐各摺片侍逆由金谿犯撫

州猛撲東門外之文昌橋經劉于濤等奮勇截擊賊仍敗回金谿

撫州之圍遂解惟侍逆自撫州受懲後循河而南圖窺建昌勢尙

鴟張著沈葆楨督飭劉于濤等軍乘勝跟追擒斬首逆務將此股

賊匪就地殄除毋令蔓及他境官軍圍攻南豐追至城下守備楊

明發等奪門而入均經中槍殞命該縣城池未能卽復是否後隊

不克繼進以致未能得手著沈葆楨檄飭席寶田韓進春等激勵

各營迅復南豐縣城以期節節掃蕩僞王宗一股由新城瀘溪入金溪界以會侍逆林正揚一股由石城甯都折而西趨爲瑞金雲都興國兵練所擊南入福建之甯化界陳炳汶尙在弋貴之南鄉汪海洋於城坊湖坊築壘尾隊出沒於弋鉛交界之黃沙港金壇句容竄賊復至德興江省羣賊如毛勢殊岌岌若非及早殄除於全局殊有關繫著曾國藩統籌布置妥爲兼顧並飛催鮑超帶領所部迅速馳援江西王文瑞見紮永豐劉典已抵袁州應如何厚集兵力分路進剿之處著楊岳斌沈葆楨妥籌辦理江皖情形甚屬喫緊著楊岳斌懍遵前旨速赴該二省扼要駐紮力圖掃蕩將此由六百里各諭令知之○廣江蘇鹽城縣學額七名高郵州三名湖北通城七名四川洪雅二名簡崇慶廣安印瀘灌綿竹達渠仁壽南苑三台中江樂山犍爲峨眉榮宜賓富順蒲江各一名○

予江蘇陣亡總兵官張行科江西陣亡參將胡迪堂等祭葬世職
○庚戌諭內閣前因權授江蘇省總兵戈登協克常州降旨賞加
提督銜並頒給旗幟功牌以示優異仍俟將常勝軍部署妥協再
由李鴻章奏請嘉獎茲據李鴻章奏戈登部署所帶之常勝軍甚
屬妥協請旨嘉獎等語戈登自上年春間協同官兵攻克福山解
常熟之圍又克復太倉州崑山吳江各縣及蘇州省城本年克復
宜興溧陽縣並擊退楊厚竄賊攻克常州府城屢著勞績茲復將
常勝軍布置妥協俾克經久利用不但始終奮勇出力且能深明
中外和好大體殊堪嘉尚戈登著賞穿黃馬褂賞戴花翎並頒給
提督品級章服四襲以示寵榮○諭議政王軍機大臣等李鴻章
奏裁遣常勝軍連日辦理就緒各情一摺常勝一軍經李鴻章設
法裁遣酌畱礮隊六百人槍隊三百人分紮潯關崑山等處籌辦

甚屬周妥惟據稱先將外國兵頭撤遣厚給川貲限三日內出城
次卽遣散中國兵勇酌給盤費驅令出城等語外國兵頭遣散後
見往何處是否在上海逗遛中國兵勇均已帖然就道是否各回
本籍抑仍在蘇滬一帶結隊成羣李鴻章仍當嚴密查察此等強
悍之徒業經散遣斷不可令其復行聚集一處滋生事端巴夏禮
以上海地面應由中國派兵保護俾該國得以撤退駐守弁兵該
國固爲節省經費起見但中國地土用中國官兵保護亦屬理所
宜然該撫片稱於裁遣常勝軍後擬檄劉秉璋七營移防松滬摺
內又稱擬添調數營駐守上海附近地方未知數營是否卽在七
營之內未據聲稱明晰至松滬一帶既有防兵而上海附近地方
尤應分撥勁兵數百駐守至程學啟所部之軍素爲洋人信服駐
防上海非此軍不可本日據總理衙門王大臣奏已與駐京公使

言定李鴻章可卽照辦不可再行更調他軍是爲至要另片奏調
派郭松林等三十營由宜興分路進取長興調李朝斌督帶水師
四營由夾浦口會合進攻以掣湖城賊勢並派劉銘傳等營接防
句容東壩等處要隘豫截金陵竄賊等語長興一城得郭松林等
水陸進攻不難力拔一俟克復長興後該撫卽當激勵各軍直抵
湖郡與浙軍兩路夾擊迅拔堅城惟金陵城大而堅曾國荃所部
兵勇圍攻恐未能周市李鴻章仍遵前日寄諭酌調勁旅數千並
礮隊數百前往會剿期於速克該撫能否親赴金陵仍著酌度機
宜迅速籌辦將此由六百里諭令知之○諭林文察奏官軍擒斬
首逆彰化解圍丁曰健奏擊散彰化餘匪暨攻毀曾厝崙一帶賊
莊各摺片前因髮逆竄入閩疆屢經諭令林文察率眾內渡嗣因
徐宗幹請催曾玉明回省亦經照該撫所請令該署提督回省督

辦內地防剿事宜茲據林文察奏逆匪陳在楊金環等襲陷犁頭店員林街各汛地攻撲彰化縣城雖經兵團擊退首逆就擒而張三顯陳弄等逆尙各糾黨嘯聚洪逆亦未弋獲丁曰健奏稱內山招撫太濫賴林各逆復勾結洪欉並各招撫股首分撲彰化縣城內山棟東貓霧犁頭店仍多賊蹤曾厝崙竹園等賊莊平毀後彰化撲城各匪復思遁往內山是臺灣逸匪尙須趕緊搜捕惟江浙髮逆擾及建甯甯化等處閩省西路之防尤爲喫重著左宗棠徐宗幹仍遵前旨催令林文察曾玉明統率所部迅速內渡以資攻剿其臺灣剿匪善後各事宜卽責成曾元福丁曰健督飭兵勇會同地方文武聯絡鄉團實力辦理曾元福丁曰健係鎮道大員均屬責無旁貸儻日久因循不能竣事以致死灰復燃再煩兵力必惟該鎮道等是問將此由五百里諭知左宗棠徐宗幹並傳諭林

文察曾王明曾元福丁曰健知之○辛亥諭議政王軍機大臣等
惲世臨奏審察江西賊情請力保贛江遏賊西渡等語據稱江西
贛東廣撫建三郡已被賊圍入無險可扼獨贛江尚可憑河設守
力保贛西七郡惲世臨前飭王文瑞劉典兩軍分防該處見經沈
葆楨將劉典調赴省城恐賊乘虛竄渡收拾愈難請仍令劉典扼
守臨江與王文瑞及水師聯絡布置所籌不爲無見惟江省軍情
前據沈葆楨奏贛江以東賊氛甚熾省城防範不可稍鬆沈葆楨
將劉典一軍調回自係爲回顧根本起見但贛江一帶防兵單薄
應否添派勁兵駐紮與王文瑞分投防守仍著沈葆楨酌量調派
劉典抵省後卽當視賊所向帶兵迎剿不得拘守省垣江省羣賊
如毛勢甚岌岌楊岳斌督辦江皖軍務當懍遵前旨力圖掃蕩應
如何進剿設防之處並須通盤籌畫隨時與沈葆楨悉心商酌妥

籌辦理憚世臨原片著鈔給沈葆楨閱看將此由六百里各諭令知之○諭憚世臨奏楚師分道入黔克復都江上江各城定旦高就壩飛各賊巢並勦撫四腳牛苗寨一摺都江上江城池逆匪叛踞有年經憚世臨派出各軍越境收復著准其擇尤保獎毋許冒濫湖南官軍入黔後連克城寨勦擒首逆各情既未據貴州督撫入奏亦未聞派兵會剿殊不可解包伍各逆蔓延日久復由秀山縣屬擾及黔楚交界之盤石營竄突靡定徐河清營壘失陷前經勞崇光等奏報未能明晰當令查明據奏見在賊勢逼近銅仁黔省下游一帶徧地賊氛勞崇光等何得漫無布置專待客兵不知該督撫所司何事著卽迅派得力之軍選募勇練分路進剿將黎古思銅等處各股匪次第勦除儻仍前玩泄任令賊蹤肆擾毫無阻遏勞崇光等其能當此重咎耶總兵金泰文業抵王嶺離洪州

不遠著憚世臨檄令卽赴洪州接辦防剿事務以便趙福元等同顧東防古州軍務卽著責成戈鑑等實力辦理將此由六百里各諭令知之○諭德興阿奏大股髮逆逼近省垣請截畱赴楚兵勇剿辦並擬挑撥馬步旗兵出城迎擊各摺片覽奏實堪詫異陝南髮逆前據劉蓉奏報肅清並據穆圖善奏曹背時一股殲滅殆盡遵飭兵勇赴鄂是省垣附近一帶已無賊蹤其蔡逆一股游弋於鎮安等處疊經責成李雲麟剋期殄滅並據劉蓉調派蕭慶高何勝必等分路截擊諒可力遏狂氛乃本月初三日忽有大股髮逆竄出大峪口焚掠尹家衛一帶逼近省垣劉蓉身任陝撫何以毫無布置亦不據實馳奏殊不可解著卽督飭所部兵勇迅圖撲滅毋得遲延干咎前有旨令劉蓉出省赴東路防剿見在省垣喫緊劉蓉自當將此股匪徒剿滅後再行出省毋得以奉旨在先藉詞

誘卸李雲麟前次奏稱蔡逆已入穀中何以剿辦尙未得手著激勵兵勇實力殲除毋得徒託空言自取罪戾穆圖善赴楚各營計距西安尙不甚遠著卽將後隊酌量調回以資攻剿該將軍等務當和衷共濟力圖埽蕩儻各存意見任令蔡逆日久稽誅大峪口股匪復行滋蔓則是自外生成卽將穆圖善劉蓉李雲麟按照軍法治罪決不寬貸大峪口賊匪果係何股初三日以後曾否接仗李雲麟剿辦蔡逆情形若何並著穆圖善劉蓉李雲麟迅卽明白回奏曹克忠一軍前在馬鹿鎮等處剿賊能否調回西安以資防剿之處著雷正綰劉蓉妥籌辦理西安省城戰守事宜仍著德興阿會同劉蓉妥爲布置毋稍疏虞金順所統馬隊卽著歸德興阿調遣都興阿覓赴定邊所有陝省後路軍情仍著隨時偵探毋稍大意將此由六百里各諭令知之○予貴州陣亡遊擊曹開先等

祭葬世職○壬子諭議政王軍機大臣等張之萬奏葛承霖等軍
追剿各股髮逆至楚並張曜等見調回馳援東路仍畱兩營駐防
浙川一摺髮逆自竄入平靖黃土兩關之後分踞信陽西南鄉一
帶窺伺州城經僧格林沁督率葛承霖等疊次剿殺追出武勝關
外此股賊匪出關見奔何處著僧格林沁查明具奏並著飭令葛
承霖等跟蹤躡剿務期掃除淨盡勿任再竄他處僞啟王一股經
張曜色爾固善等追過鄖西因山路崎嶇無從覓食而光州羅山
一帶正當喫緊髮逆各股由大新店竄至羅山之姚家坂宣化鎮
及光州之白雀園一帶張之萬已派副將徐連陞等前往堵剿並
飛調張曜色爾固善等隊馳赴信陽歸僧格林沁調遣並畱李世
玉兩營駐防浙川著僧格林沁相度賊情妥爲調度以期節節掃
蕩豫省西路防兵甚單多隆阿所部楚軍已悉數啟程赴楚著僧

格林沁官文穆圖善酌量情形南陽浙川一帶如無重兵可卽分撥數營前往駐紮張之萬請俟催調各軍東行布置一切擬卽親赴信陽會同僧格林沁熟商防剿惟汝南地方並未肅清亦關緊要信陽州有僧格林沁在彼可無庸該撫前往如須會商辦理商定後仍以分駐爲妥南陽地當衝要應否扼要駐紮該撫妥籌辦理昨據德興阿奏大股髮逆逼近省垣請截畱赴楚兵勇剿辦已諭令穆圖善將後隊酌量調回以資攻剿其先行啟程之馬步各隊如已到楚豫著僧格林沁官文分別調遣陝省兵力無多穆圖善務當抽調所部折回會同金順等馬隊及劉蓉步隊實力痛剿不得意存膜視致誤戎機前據劉蓉奏稱派防各路之軍似甚周密何以大峪口逆股二萬餘眾突如其來先事旣絕無偵探之人臨事又未能出奇制勝該撫向以知兵自許乃於此等重大軍情

毫無防備並不趕緊奏聞抑何瞽瞍若是著卽懷遵昨日寄諭與
穆圖善德興阿妥速籌辦防剿事宜曹克忠一軍如可調回西安
助剿並著一面奏聞一面飛調近日軍情並著趕緊馳奏以慰懸
繫山陽鎮安交界有無匪股竄犯亟須趕緊布置不可稍涉大意
此股賊匪奔馳飄忽恐其疾趨山西著沈桂芬勤加偵探妥籌防
剿本日據訥欽奏已帶兵行抵靈州之花馬池據奏情形靈州一
帶四面皆賊著都興阿雷正綰迅速與之會合聯絡以免孤軍深
入之慮西蒙克西克馬隊已撥歸都興阿軍營計已可到此項餉
銀著劉蓉按月籌解毋令缺乏張之萬另片奏請將江北餉銀一
萬六千餘兩並陳國瑞營餉停解等語江北各軍未撤仍須嚴防
前項欠餉一萬六千餘兩著仍行報解陳國瑞見令駐軍潁六力
固皖北地方是此軍餉項尤關緊要著張之萬督飭藩司妥籌接

濟無誤軍食將此由六百里各諭令知之○諭駱秉章奏官軍攻
勦滇匪獲勝並包逆竄入秀山調兵馳剿一摺覽所奏情形辦理
尙爲得手惟滇邊羣盜如毛雖經大創猶虞此滅彼起該督見擬
將胡中和湘果三營抽回敘南飭參將許蔭棠一軍暨敘永廳文
武嚴防邊隘卽著飭令各軍嚴密豫備毋稍疏虞黔逆包毛仙羅
發榜大股竄至秀山之濫橋地方守備楊再經等力戰陣亡此股
逆匪爲黔中歷年悍賊昨據憚亡臨奏該逆由秀山回撲松桃廐
遊擊朱衣接仗失利楚軍進援復傷亡兵勇五十餘人該逆進至
黔楚交界之盤石營屯踞是其兇狡狺狺已可想見駱秉章前調
總兵曾志友楚勇千名計已馳抵秀山復添調總兵楊燿關等三
營暨重慶鎮標兵四百餘名馳往會剿諒不難力殄狂氛著卽激
勸諸軍迅將秀山境內之賊掃除淨盡以防內竄並與黔楚各軍

聯絡聲勢妥籌夾擊毋任蔓延將此由五百里諭令知之○諭前
因崇實等先後陳奏西藏情形並滿慶等奏買巴札倉喇嘛搶去
已革待審之堪布等情疊經諭令崇實等查明辦理並催福濟景
紋迅速赴藏茲據福濟景紋奏稱由鑪城以至乍察道途仍難行
走等語由川赴藏道路見在仍前梗阻福濟等尙難前進惟藏中
禍患日深福濟景紋一日不到變亂一日不了著崇實駱秉章福
濟景紋嚴飭吏致康向明正等土司妥爲開導卽令迅速設站以
期疏通驛路福濟景紋仍一面設法前進懷遵疊次密諭妥速查
辦若專以道路未通爲詞一味遲延推諉置大局於不顧朝廷法
紀具在福濟景紋其能當此重罪耶所有揀補僧俗番目等缺既
據奏稱尙未身歷其境虛實難以懸揣卽著福濟景紋於抵藏後
趕緊辦理一秉至公毋稍遷就拉里糧務嚴清柴所稟李玉圃馬

騰蛟與璧喜等狼狽爲奸各情其言是否確實著崇實駱秉章福
濟景紋查明具奏嚴清榮原稟著鈔給崇實駱秉章閱看將此由
五百里各諭令知之○河南巡撫張之萬奏汝南官軍攻克徐文
田等寨得旨仍著毛昶熙將時王洗一寨迅卽督軍攻拔肅清新
蔡全境○予四川陣亡遊擊楊再經等祭葬世職○癸丑諭議政
王軍機大臣等穆圖善等奏暫畱赴鄂後起馬步各營劉蓉奏髮
逆與蔡逆合併逼近省城各摺片僞啟王梁成富等由荊子關竄
鄖西經官軍扼截回遁土門與蔡逆勾結徑由鎮安孝義一路出
大峪口逼近西安前據劉蓉屢次陳奏布置情形一似防剿均有
把握此次髮逆大股突偏省垣劉蓉毫無準備任令賊匪來往自
如如入無人之境該撫平日所派各路防軍不識所司何事且此
股賊匪眾至二萬有餘而自荊子關鎮安孝義一路長驅直入該

撫先事毫無偵探及至逼近省垣始知該逆回竄似此昏憤糊塗實屬有負委任李雲麟專辦蔡逆一股前據劉蓉奏李雲麟聲稱該逆已入穀中可期必滅此次由鎮安句結啟逆出竄李雲麟不但不能力圖剿滅並任令窺伺省城該京卿言大而夸一味紙上空談實堪痛恨劉蓉李雲麟均著先行交部嚴加議處穆圖善等見調孟宗福黃金山等步隊六營折回赴省卽著檄令該員等迅速回援會同省城防軍實力剿洗楚省調去兵將爲數不少計已足敷剿辦而陝省竄賊麇聚勢甚危急穆圖善著暫時毋庸赴楚仍駐西安會同德興阿劉蓉辦理防剿事宜以嚴省城之防俟陝省肅清再行奏請石泉甯陝漢陰各隘著李雲麟嚴加防守以遏該逆下竄之路一面將蔡逆一股趕緊殲除毋令匪勢益肆蔓延穆圖善德興阿劉蓉李雲麟惟當會籌戰守督飭各軍實力剿洗

先將竄近省垣之賊斬馘淨盡節節掃蕩如再有疏失必將劉蓉李雲麟按照軍法治罪穆圖善德興阿會同剿賊均屬責無旁貸如不能得力定將穆圖善德興阿一併治罪決不寬貸將此由六百里各諭令知之○諭都興阿奏接奉寄諭並沿途探悉形勢擬辦情形一摺據稱近日於沿途探訪情形詳按圖勢靈州左近山路崎嶇險要必爲賊守由定邊至甯夏四百餘里又阻黃河賊情叵測未必遙聞援軍將至卽露倉皇情形恐有詭計怠我軍心查甯郡漢城在北滿城在南必得一軍由北山進剿方有制勝之機若西蒙克西克等過渡會合甯夏官兵與北山前後夾擊可斷該逆往來之路請飭綏遠城將軍豫行知會鄂爾多斯各旗備濟駝隻並派兵會合阿拉善兵相機兜剿該將軍進規靈州兩岸進攻始於援甯有裨等語所奏不爲無見著都興阿催督各軍規取靈

州訥欽已到靈州之花馬池該將軍當與之聲勢聯絡量爲調遣如察看該員不能得力或將其兵勇裁撤或調派赴北路防堵均著察覈辦理西蒙克西克等如已到營著卽催令迅速援甯並分撥馬隊由安邊堡一帶出邊急趨鄂爾多斯副盟長扎薩克郡王東魯布札木素居處之地探明過渡設法會合甯夏滿城官兵與北山前後夾擊先通官軍糧道兼斷該逆往來之路慶昫仍當就見有兵力嬰城固守俟援軍到後會合剿擊賊情如果惶懼何以未見解圍他竄恐是裝點羸弱情形懈我軍心慶昫不可墮其術中是爲至要官軍由南路進剿若北路無兵阻遏必不能收聚殲之效前已諭理藩院飭阿拉善王統兵數千從磴口進邊列陣嚴扼竄越遇賊卽擊其北路平洪孤城等處並令撥兵防守著都興阿德勒克多爾濟等遵旨傳知該王迅卽派兵赴防並令多備駝

隻以資運解軍需之用桂成尙稱勇往著卽統帶勁兵會合阿拉善王部下防兵出甯夏北山進紮險要相機兜擊歸綏本處之防亦關緊要恐有外來奸回勾結滋事著德勒克多爾濟實力經理毋得稍涉大意平涼之圍已久雷正綰當力圖攻克以便進兵甯夏都興阿將次入甘該提督當與之聲息相通會商妥辦以期早日竣事都興阿另片奏調員赴營差委一片翁同書未知已抵何處並准都興阿行文直隸山西陝甘各督撫傳知該革員卽赴軍營效力前諭令赴營之藩司文格俟到營後著都興阿飭令卽赴蘭州一面附報奏聞將此由六百里各諭令知之○甲寅申諭各督撫嚴覈保舉人員○乙卯諭內閣原任杭州將軍瑞昌前在杭州殉難業經降旨從優賜卹並給予世職茲據左宗棠奏瑞昌之妾吳氏於城陷時逃出見已回至杭州伊子緒成緒恩年皆幼穉

當時被衝散無蹤見經展轉物色始悉其第三子緒恩爲人收養業已給予吳氏領回派員護送回旗等語瑞昌前在杭州守城有功旋復見危授命大節凜然據奏其幼子緒恩散失多年竟能無恙覽之實深欣慰著俟護送到京時卽由鑲黃旗滿洲傳知瑞昌長子內閣中書緒光領回收養緒光著該旗卽行帶領引見緒恩著俟及歲時由該旗帶領引見緒成尙無下落仍著左宗棠隨時詳細訪查以示朝廷篤念忠良推恩後嗣至意○左宗棠奏湖郡踞逆於三月二十五日猛撲埭頭鎮提督高連陞營壘經高連陞等擊敗後仍堅守東林山菱湖等處四月初四日通判蔡元吉率所部與總兵劉連陞各營水陸並進直擣菱湖賊巢該逆憑河結壘未能猝拔十四日各營梟水過河斃賊數十名乘勝猛攻連破賊營十餘座奪賊礮船四號蔡元吉復率親兵由後路鈔殺而入

斬賊五百餘名生擒一千餘名立將菱湖鎮攻克十五日蔡元吉率隊進攻荻港該逆望風潰竄當將荻港賊壘焚毀總兵劉梅元等營進紮東路舊館雙林等處十二三等日遊擊何培英率隊至卡生橋奮力衝擊斃賊多名十四日該逆分兩路直撲雙林何培英營壘劉梅元率所部馳往助勦力戰卻之是晚該逆退聚卡生橋一帶十六日劉梅元復與何培英等分三路進擊並令礮船轟攻賊壘賊不能支棄壘焚橋而遁據生擒賊供僞樂王譚應芝已經官軍轟斃首逆黃汶金之弟黃十四亦受重傷提督高連陞等偪紮東林山後探聞湖郡踞逆萬餘又至妙喜鎮十五日高連陞約會總兵王月亮分撥各營水陸並進守卡各逆紛紛潰竄高連陞王月亮踴躍先登立斃守壘悍賊數名賊棄壘狂竄當將東林山賊壘五座一律攻克二十一日署湖州府知府李邦達督帶降

人鄧洸明各營進駐妙喜鎮王月亮率各營助之該逆率眾萬餘繞出妙喜鎮分路來撲遊擊甯世杰胡榮兩營先潰致各營俱爲所乘時高連陞單騎馳至急與王月亮李邦達派先字三營連擊詎該逆又分兩大枝從旁鈔襲王月亮鄧洸明督各勇突出重圍而勇丁已傷亡數百名遂將隊伍收回埭頭駐紮高連陞亦將所部由菁山折回該逆以全力守湖郡經官軍疊次攻勦將菱湖東林山兩處要隘攻克東南之險已爲我據惟賊勢趨重西路日將城內米糧運至長興四安廣德等處而安吉亦添賊黨蓋欲畱此路爲鉞走之計官軍進規湖郡西南兩路自應厚集兵力攻勦而東北濱臨太湖與蘇常接壤非蘇軍水陸進逼則此剿彼竄事有固然臣昨咨商江蘇撫臣李鴻章請調嘉興之師與太湖水師併力進扼湖州北路以防竄越宜溧而湖州西路長興安吉均與皖

南之廣德甯國接壤皖南旣無防軍浙師又勢難越境截堵祇可於皖浙交界之處相機扼擊不能禁其不闌入皖界也頃據謀報堵輔各逆欲分三路傾巢內竄已飭水陸各軍嚴密準備如能就其來犯痛與勦洗則兇鋒盡挫縱有竄逸之賊亦易收拾又奏常州竄出之賊偽烈王林彩新一股經康國器所部在昌化白牛橋擊敗後悉向甯國績溪一路竄去四月初七日竄至歙縣南建口地方適黃少春所派張福齊等率各營奮擊賊不得渡遂於建口一帶屯踞初八日張福齊等復會同唐連勝水師列隊迎擊奮威衝殺共斃賊四五百名其繞竄夥縣八都葉村者又爲徽軍擊敗聞由上溪口竄婺源入江西德興人數無多至聽逆陳炳汶溱逆汪海洋竄入江西玉山縣境四月初一夜從沙溪搶搭浮橋意圖偷竄劉明珍派王益隆等於沙溪上五六里乘筏潛渡擊之殺賊

三四百名餘賊悉向西北竄去劉明珍恐其直犯廣信率隊急趨信城該逆頭隊已及靈溪而先竄沙溪一股見官軍馳援廣信復折向廣豐邊界竄去是日劉明珍率所部擊賊於靈溪斬賊二三百名遂收隊回城時王德榜一軍亦已行抵廣信四月初四日各率所部出廣豐洋口截擊過半賊大隊蟻擁而來劉明珍與王德榜合軍痛擊斃賊千餘名賊竄廣豐二十九都初五日官軍奮勇追殺又斃賊數百名餘賊竄向鉛山一路旋因賊由南岸竄至上清宮一帶撫州喫緊王德榜當派戴奉聘三營馳赴貴溪自率所部進駐弋陽二十二日派主簿劉廷選水師礮船護運米糧軍火行至距弋陽二十餘里之黃沙港該逆設卡攔截矢石如雨我軍以槍隊轟擊賊潰走港內賊船十餘隻亦經水師擊毀查該逆大股兩經浙軍截剿一經徽軍截剿逸賊無多尙不足爲江西之患

惟由浙境竄踞湖坊陳坊之賊與由皖境竄江西一股合併而前由江西竄福建之賊見復回竄江西各股併聚一方深爲可慮臣前飭王開琳一軍赴援江西見據報已抵貴溪王德榜已抵弋陽聲勢尙爲聯絡昨接劉典來稟新募之三千人於四月初二日自湘啟程計此時早已抵袁州臨江一帶臣已飭王開琳王德榜兩軍並歸劉典調度俟湖城賊蹤稍定仍當酌調瀘遂防軍馳赴江西爲其後繼又奏正拜摺聞據王德榜稟稱該軍馳抵弋陽後探悉德興竄賊於四月二十五日全股撲至弋陽東北門外王德榜親督鍾元等迎勦楊士樑等率馬隊繼之擒斬冷天燕鄭錠懷冷天安張得幅僞丞相吳得斌等各賊目餘匪殄斃無算賊向河西一路竄去查該逆由德興竄來係粵逆林彩新一股經各軍疊次截擊餘黨所賸無幾惟此股係常州竄出之頭隊其續竄數股見

尙屯踞湖州安吉等處臣仍當飭上游各軍嚴密防範 上諭議
政王軍機大臣等髮逆以全力踞守湖郡經高連陞蔡元吉兩軍
奮勇進剿將菱湖東林山兩處要隘攻克東南之險已爲我據惟
妙喜鎮營盤爲賊所乘致有挫失見在浙師尙未移紮西南而賊
勢趨重西路運糧增黨刻刻爲鋌走之計李鴻章前奏已派郭松
林等三十營由宜興進調李朝斌陽利見等水師進取長興蘇浙
官軍會合夾擊自可迅下堅城第長興安吉在在與皖之廣德甯
國接壤皖南防兵旣單浙師又難越境截堵曾國藩雖派周寬世
等駐紮祁休之間而於廣德甯國守禦事宜尤當妥籌布置力遏
上竄其長興湖州等處之賊左宗棠李鴻章督飭在事員弁實力
堵剿總當將積年悍賊就地殲除毋令貽患他省堵輔各逆旣有
分路內竄之謀左宗棠當飭水陸各軍嚴密準備如能力挫兇鋒

則羣賊喪膽於攻取湖州自可事半功倍粵逆林彩新一股兩經浙軍截剿一經徽軍截剿竄逸無多惟由浙竄江一股見踞湖坊陳坊等處與前股合併而竄閩之賊見復回竄江西屬集一方甚屬可慮楊岳斌接奉疊次諭旨計已剋日啟程卽著督飭江右各軍次第掃蕩以副委任劉典見已抵江楊岳斌未至以前所有浙師王開琳王德榜兩軍卽著暫歸劉典調度弋陽境內竄賊經浙江官兵擊退餘賊向河西一路竄去著沈葆楨嚴飭在事文武實力追剿毋稍疏懈此時賊勢固結不解必須將金陵迅速攻拔使該逆無所依附自成瓦解之勢前經疊諭李鴻章撥兵助攻金陵見當事機緊要之時李鴻章務當不分畛域不避嫌怨力圖共濟不准稍有推諉將此由六百里各諭令知之○廣山東長山縣學額二名○丙辰諭議政王軍機大臣等官文奏擊退阜市京天應

城髮捻並藍逆西竄及髮逆尾股竄犯鄖西官兵出境追剿各摺
片湖北天門應城等處賊匪經梁洪勝李喜溢等屢次剿擊紛紛
敗退猛撲京山縣城又經防兵鄉團抵禦該逆向宋河奔逸至馬
平港尾股陸續竄向德安西北之洛陽店桑樹店一帶見在京天
阜市應城已無賊蹤而德安極爲喫重阜市敗匪全數東趨東北
東南徧地皆賊自應山之廣水孝感之小河司楊店一帶漸近雲
夢有自小河溪分竄黃陂黃安邊境者有由應山而至黃陂站者
官文見調成大吉十營爲遊擊之師聯絡石清吉楊朝林各營相
機堵剿撥李喜溢等防灞口漢口等處並畱守京應仍防被剿各
賊回竄雲孝一面飛催姜玉順等趨行並催蘇克金傅振邦繞前
截擊布置均屬周妥著卽嚴飭派出各軍以剿爲防並催蕭河清
等迎頭擊剿僧格林沁見紮信陽著卽調派勁旅迎剿蘇克金傅

振邦馬步隊在應山尙爲賊阻必須令其設法繞道務出賊前斷其東趨之路信羅先固一帶逼近賊氛張之萬當嚴防竄越該逆若由黃麻以窺英霍則舒桐潛太路路喫重曾國藩當懷遵疊次諭旨增兵嚴防並令水師嚴防江面勿令窺覷陳國瑞一軍前經喬松年奏請令駐潁六一帶著僧格林沁喬松年飛檄該提督扼紮六安潁州要隘地方遇賊卽擊毋稍疏懈皖北兵力如尙不敷著喬松年卽咨商曾國藩等撥鎮江餘兵四千人赴防或商撥揚防兵勇均須趕卽籌畫不可臨事張皇致誤大局陳國瑞一軍尙恐單薄由鎮防撤回江北之兵勇爲數不少著富明阿酌派勁兵爲陳國瑞等軍後路聲援並酌量地勢駐紮若有緊報卽由富明阿就近調派協同剿洗以資得力以上各路著各該督撫等認真調派飭令實力防剿儻任該逆東竄由何路行走竄越地方不能

阻遏必惟該省督撫是問不能因有前功稍從寬貸也懍之慎之
官文另片奏藍逆二順向山陽鎮安等處竄逸僞啟王一股撲鄖
西縣城梁作楫等率軍擊敗此股敗匪與藍二順句合業由小路
竄至陝西去西安止數十里穆圖善已折回省垣其先行啟程之
馬步各隊諒可陸續到楚豫境內著僧格林沁官文趕緊催調布
置以厚兵力近日軍情並著各路勤加偵探飛催奏聞以紓朝廷
南顧之憂將此由六百里加緊各諭令知之○命步軍統領等衙
門嚴緝迷拐匪徒○丁巳諭議政王軍機大臣等前因有人奏恩
麟辦事顛預不學無術潘祖蔭奏甘省大吏辦理軍務乖方並都
察院奏胡第甲等以狃和殃民等詞赴該衙門呈訴各摺先後交
多隆阿秉公查辦茲又先後有人奏甘肅逆回煽亂焚殺延及附
省之狄道河州等處署督臣督辦不力並恩麟專意主撫逆勢愈

張知府徐辰告等四員爲守兼優足資驅策總兵張華等五員貪鄙各款貽害地方文格素稱廉謹於軍務不甚相宜請旨飭查各等語甘肅吏治軍務廢弛已極亟應嚴行查辦以挽頽風著都興阿將此次所參恩麟等款並前交多隆阿查辦各案一併秉公確查據實具奏都興阿甫經入甘無所用其迴護務將交辦各案嚴密訪查毋得稍涉徇隱諭旨三道摺五件紳士信函一件呈二件條陳一件均著鈔給閱看將此諭令知之○諭慶昫常陞奏圍城賊眾忽退見在辦理情形一摺甘肅逆回自本年二月間圍攻甯夏滿城暗決城西支渠放水灌城經慶昫等急令附城民人開田宣洩得保無虞四月初七日城外南北賊營忽同時拔退復於夜間決渠灌城因滿城依山且係沙地滲水並未淹及慶昫等趁賊眾暫退派員前赴山北提運黃米小麥四百餘石並慶陽糧臺餉

銀五千兩入城暫資支放甯夏賊氛甚熾此次暫將城圍撤退乘雨決水灌城逆謀甚屬兇狡訥欽援軍雖已行抵靈州因續調直晉官兵到者甚少趙延烜在定邊所募勇丁亦因前赴慶陽稟請軍械餉項俟多隆阿營內所撥馬隊到齊先攻靈州始能赴援甯夏是該處滿城防勦仍形喫緊都興阿前奏西蒙克西克等到營卽令過渡會合甯夏官兵前後夾擊業經諭令德勒克多爾濟等傳知鄂爾多斯各旗多備駝隻並諭知桂成帶兵會合阿拉善王部下防兵出甯夏北山夾擊著都興阿懷遵疊次諭旨迅督各軍趨程前進會合訥欽所部相機進兵並著雷正綰督率諸軍迅將平涼攻拔與都興阿各營聲勢聯絡慶昫仍當就見在存城兵力加意激勸嬰城固守以待援軍毋稍疏懈滿城兵食不充歸綏道庫存餉三萬兩山西續撥餉銀一萬兩計日應可提到卽著慶昫

等飛速咨提到營並著文煜懷遵前旨將援甘各軍應需糧餉軍火源源籌解並將趙延烺等軍所需軍械餉項迅速應付以利師行至回情反覆堪虞慶昫等所奏鎮屬回官馬謙遣人單騎來城甘言求撫且稱鎮道印信已交中衛縣由梁生嶽等齎送省城必係因雷正綰進攻平涼疊次獲勝冀以甘詞邀撫緩我師期斷不可信慶昫等惟當激勵兵勇加意防範勿又墮彼狡謀致蹈漢城覆轍雷正綰亦當乘賊情少懈之時迅圖攻克平涼以副委任將此由六百里各諭令知之○戊午諭內閣前因曾國藩奏浙江提督鮑超聞計丁憂當經明降諭旨毋庸開缺改爲署理俟江南軍務大定再行給假回籍營葬茲曾國藩復據情代奏懇請賞假回籍葬親等語情詞肫摯出於至誠原應勉如所請惟念鮑超自轉戰江皖以來勇略過人所向克捷爭關奪隘屢保名城見因賊竄

江西復經曾國藩檄令率師往援江皖軍情緊急雖經簡派楊岳斌督辦仍須該提督合力剿賊方可迅奏膚功鮑超著毋庸給假回籍加恩賞銀五百兩由四川藩庫給發交該提督家屬祇領經理喪事鮑超務當念移孝作忠之義勉抑哀思專意剿賊俟金陵克復江皖肅清再行賞假回籍以遂孝思朝廷破格奪情本屬萬不得已之舉該提督其勉力圖功毋再瀆請○諭議政王軍機大臣等曾國藩奏近日各路軍情妥籌布置等語侍逆一股攻破建昌之萬年橋卡壘陷宜黃崇仁兩縣卽在崇仁繕城擄糧爲久踞計自樟樹鎮及豐城新淦峽江等縣處處喫緊省城戒嚴沈葆楨調萬泰等管帶潯兵進省彭玉麟派喻俊明等各率師船駛入省河曾國藩又檄周寬世七營赴援省垣重地或可無虞惟賊勢如此猖獗沈葆楨何以尙無奏報甚深懸繫著楊岳斌恪遵疊次諭

旨迅赴江西與沈葆楨妥籌防剿當力保樟樹鎮等處要隘迎頭截剿毋令逼近省垣一面迅催劉典王文瑞等軍向東迎擊會合鮑超赴援之師痛加剿洗將崇仁宜黃迅速攻拔不使羣賊竄渡贛江以西致滋延蔓南豐圍攻日久何以尙未克復著沈葆楨嚴飭席寶田等軍奮力進剿不准再事遷延此時各路敗賊麇集江右其勢岌岌而湖州之賊時思接踵上竄曾國藩當恪遵前旨迅撥勁兵於皖南一帶力籌堵截毋使逆股再竄江西致勢成燎原不可收拾左宗棠督飭各軍會合蘇省水陸官兵迅將湖州長興攻拔一面分兵截剿由浙皖邊境上竄之賊毋令貽患鄰疆髮捻分竄黃陂孝感之間逐漸東趨曾國藩咨商李鴻章撥軍接守建平溧水高淳三縣騰出李榕王可陞等軍渡江而北扼紫舒桐所籌甚是卽著李鴻章迅速撥兵扼守並著曾國藩飭李榕等迅赴

舒桐力固藩籬喬松年督飭皖軍先事布置不得稍有疏虞見在
羣賊紛竄總當迅拔金陵覆其巢穴曾國藩當嚴飭曾國荃督率
所部奮勇圖功不得再有稽延李鴻章恪遵前旨不分畛域撥兵
助剿或親往會攻毋稍避嫌推諉將此由六百里各諭令知之○
己未諭內閣前因吏部奏道員蔣澤春經張凱嵩保奏請以道員
記名簡放覈與章程不符應行駁正曾經降旨允准茲據張凱嵩
奏粵西逆匪范亞音陷踞容縣十年爲東西兩省巨患經蔣澤春
督率兵勇攻拔容縣城池兼擒首逆實與尋常勞績不同請仍以
道員記名簡放等語按察使銜廣西補用道蔣澤春著照張凱嵩
所請仍以道員記名簡放以示鼓勵○諭議政王軍機大臣等連
成奏本月十一日有馬賊卅餘人在順義縣搶劫行車當經憲克
通阿選派領催等官會同該縣兵役分路追拏行至大興縣孫墩

鎮地方遇賊接仗拒傷多人請將傷亡兵丁議卹並請飭直隸一體嚴拏各等語馬賊竟敢在近畿一帶拒捕傷兵實屬兇惡已極若不嚴行查拏必致滋蔓日多且此起馬賊既由潮河川水關闖入該處緣營兵役何以追趕不及任其竄逸可見捕務全未認真見在賊匪已向孫墩鎮西北一路遠去著直隸總督順天府兼尹府尹嚴飭所屬跟蹤兜拏毋任漏網連成亦當飭令駐防官兵會同各該地方兵役一體協拏以靖地方將此各諭令知之○吏部奏遵議陝西巡撫劉蓉候補四品京堂李雲麟處分得旨均著加恩改爲革職留任○廣西巡撫張凱嵩奏援黔粵軍攻克紀賴等處賊寨得旨著督飭楊廷桂乘勝追剿務將逆首李七擒獲盡戮醜類毋令漏網○庚申諭內閣朕奉 慈禧皇太后 慈旨據御史賈鐸奏風聞內務府有太監演戲將庫存進貢段

匹裁作戲衣每演一日賞費幾至千金請飭速行禁止用以杜漸防微等語上年七月因皇帝將次釋服 文宗顯皇帝梓宮尙未永遠奉安曾特降諭旨將一切應行慶典酌議停止所有昇平晷歲時照例供奉俟 山陵奉安後候旨遵行並將咸豐十年所傳之民籍人等永遠裁革原以皇帝沖齡踐阼必宜絕戲渝之漸戒奢侈之萌乃本日據賈鐸奏稱風聞太監演戲費至千金並有用庫存段匹裁作戲衣之事覽奏實堪詫異方今各省軍務未平百姓瘡痍滿目庫帑支絀國用不充 先皇帝山陵未安 梓宮在殯興言及此隱慟實殷又何至有如該御史摺內所稱情事況庫存銀段有數可稽非奏准不能擅動茲事可斷其必無惟深宮耳目恐難周知外間傳聞必非無白難保無不肖太監人等假名在外招搖亦不可不防其漸著總管內務府大臣等嚴密稽查如果

實有其事卽著從嚴究辦毋得稍有瞻徇致干咎戾皇帝典學之餘務當親近正人講求治道儻或左右近習恣爲娛耳悅目之事冒貢非幾所繫實非淺鮮並著該大臣等隨時查察責成總管太監認真嚴禁所屬嗣後各處太監如有似此肆意妄行在外倚勢招搖等事並著步軍統領衙門一體拏辦總管太監不能舉發定將該總管太監革退從重治罪若總管內務府大臣等不加查察別經發覺必將該大臣等嚴加懲處其各懷遵毋忽此旨並著敬房內務府各錄一通敬謹存記○諭議政王軍機大臣等傳諭以甘總督恩麟恩麟奏蒙古臺站遺棄摺報檢獲呈進回匪闌入狄道州城旋即收復見時籌辦情形各摺片恩麟上年十二月初三日所發奏報由阿拉善旗轉遞至鄂爾多斯因何疏失以致遺棄道旁亟應徹底根究以肅郵政著該護督查明據實參奏隆

德泰安等處之匪勢日益蔓延恩麟請飭雷正綰等速撥一軍馳赴安會雷正綰見與陶茂林進攻平涼漸次合圍攻剿正在喫緊且該提督等兩軍兵力本單此時殊難分兵再行駐紮安會恩麟惟當就見有兵力嚴密布置以扼東西兩路之防都興阿日內卽可由定邊進剿兵力旣集可期節節掃蕩恩麟毋得專意主撫致墮該逆詭謀貽誤全局狄道州城被回竄陷旋卽收復著恩麟督飭將弁將入山敗匪搜捕淨盡毋畱遺孽署蘭州道崇保署蘭州府知府豫師於所屬城池被匪闌入本有應得之咎惟旣隨同收復所有處分均著寬免河狄等處回匪猖獗該護督身膺疆寄不能實力剿辦屢次陳奏猶以主撫爲得計殊嫌曉瀆知州趙必達所募川勇五千見已由川啟程著卽飛催該員迅速回甘擇要分紮與省城防軍聯絡聲勢以壯軍威恩麟拊設宣威營親軍著卽

按照章程認真訓練以期一兵得一兵之用不可有名無實○新授陝甘總督楊岳斌奏陳謝恩並卽赴江西整飭諸軍力籌攻剿得旨該督蒞陳各情具見誠恤水師與陸路雖不同而指揮調度理無二致該督膺茲重寄著遵照前旨迅赴江西督飭諸軍力圖掃蕩俟江皖賊氛淨盡卽行前赴陝甘任事一切慎勉爲之以副委任○予甘肅陣亡署知州屠旭初等祭葬世職○辛酉 上詣大高殿祈雨○僧格林沁奏四月二十一日頭股髮逆竄至羅山迤南仙花店一帶二股髮逆由德安迤北馬平港等處渡過府河竄距應山之駱家店經蘇克金傅振邦等帶領馬步各營追至應山之劉家店分路包鈔該逆拌命狂奔二十五日蘇克金等探得該逆在小河司一帶盤踞卽令馬隊紮於山頂以備應援步隊向前迎敵槍箭齊施並令營總烏爾圖那遜自右鈔擊賊後該逆始

行退去蘇克金巴揚阿探得三股髮逆陳得才自西路阜市奔至平林市由府河東竄欲與前股合夥當撥馬隊各營進紮五月初二日在應山陳家畝接仗該逆分四股迎撲卽被我軍擊退斃賊多名訊據獲賊供稱陳逆盤踞宋河欲竄襄江不能搶渡因宋河地方無處打糧欲竄黃州以備裹糧設或不能東下就在黃州避伏將來仍欲沿江而下等語臣仍嚴飭蘇克金等馳往迎擊並函致督臣官文督飭所部各軍實力追擊又嚴飭水師於沿江一帶認真堵禦勿令偷渡其前派副都統色爾固善總兵張曜追剿髮逆梁成富一股四月十一日經我軍窮追該逆自鄖陽屬之羊皮灘一路潰敗竄至陝西之漫川關上津一帶勢極窮蹙所餘不過數千人既有楚豫官軍前截後追足敷剿辦惟髮逆麇聚楚豫之黃州光山一帶是豫東邊防又形喫緊當將色爾固善張曜等軍

撤回東路以厚兵力其西路殘匪卽飭鄖陽鎮總兵安貴道員梁作楫認真追剿務與陝省官軍併力夾擊盡殲醜類並飛咨督臣官文撫臣劉蓉嚴飭所部各軍實力剿辦毋任蔓延髮捻各匪見在分股東竄前股由羅山仙花店趨光山之新集等處二股由孝感黃陂東竄豫東楚北均形喫重臣已飛札蘇克金等移營光山與張曜等軍會合進剿臣見紮息縣以防北路仍不時偵探賊蹤儻該逆分股東趨卽撥隊跟追如全數東趨臣卽拔隊東下親督進剿但期該逆竄至淮北一出稻田馬隊得有地勢卽可竭力截擊至前奉諭旨飭調陳國瑞一軍駐紮臨淮遵於四月二十三日咨行漕臣吳棠檄令陳國瑞迅帶所部前往臨淮扼紮並咨行撫臣喬松年飭令臬司英翰帶領兵勇會剿復因髮捻各匪漸次東趨又咨照喬松年轉飭陳國瑞英翰等軍移紮正陽關扼要堵禦

以期有備無患。上諭議政王軍機大臣等髮捻各匪分股東竄豫東楚北並形喫重僧格林沁令蘇克金等移軍光山與張曜等會合進剿而自紮息縣以防北路著卽嚴飭蘇克金等將竄犯光山之匪迅卽剿除該大臣居中調度仍當多設偵探儻逆眾東趨卽拔隊東下以固皖省門戶陳國瑞英翰二軍卽著僧格林沁喬松年催令帶隊駐紮正陽一帶扼要堵截偵探賊蹤所向迎擊喬松年並當整頓兵勇備豫不虞免致臨事周章又多棘手見在孝感敗賊有直趨黃州之勢著官文懍遵屢次諭旨嚴飭派出各軍認真剿擊並令水師於沿江一帶堵禦勿任一賊偷渡武昌省城防範最關緊要唐訓方督同在省文武悉心辦理不得稍涉大意逆竄光山羅山則商城固始均屬喫緊張之萬身任豫撫何得置身事外著卽添調勁旅以剿爲防並催令張曜等會同僧格林沁

所派馬隊遇賊卽擊毋任賊匪東趨貽鄰疆以無窮之患梁逆由鎮安一路竄出大峪口不過數千敗匪而德興阿劉蓉前奏匪眾二萬餘究竟匪數若干是否句結蔡逆合股近日西安情形若何曾否與賊接仗著劉蓉趕緊查明具奏安貴梁作楫於此股匪徒竄過鄖西何以不能追擊並著官文嚴飭該鎮道等分兵入陝助剿不得強分畛域將此由六百里諭知僧格林沁官文喬松年張之萬劉蓉並傳諭唐訓方知之○左宗棠奏粵逆林彩新由德興竄至弋陽經道員王德榜一軍於四月二十五日擊敗復竄至湖西王德榜於二十六日率各營銜枚疾進破其一村賊擁大轎正圖奔逸王德榜與總兵蕭得龍等追至將其護從之賊殺散見轎內有賊目一名手刃之是役殺斃溺斃之賊約數千名該逆由湖西敗竄至黃沙港對岸楊家坂五羊店一帶屯踞仍圖過河與南

岸之賊合併二十七日王德榜督各營分路齊進該逆望風潰竄王德榜揮軍分三路環攻該逆勢窮力竭悉多偪溺水中其南岸來援之賊亦殲除淨盡是役共斃賊千餘名生擒二百餘名內有僞天將周濟川等賊目七名訊明卽於軍前正法其僞烈王林彩新據獲賊供稱已被官軍偪溺而斃惟聽逆陳炳汶濂逆汪海洋等股尙屯踞湖坊陳坊一帶總兵王開琳已率所部移紮河口鎮擬卽會同王德榜一軍相機進剿沈葆楨奏侍逆於撫州敗後沿河上竄四月十九日繞襲踞建昌之萬年橋二十日劉勝祥席寶田等迎剿斃賊甚多該逆復由下游西渡於二十五六等日分竄宜黃崇仁五月初三日江忠朝以精捷營跟追敗之於崇仁城外殺賊六七百人席寶田與劉勝祥統兵繼進劉典於二十七日抵臨江將各營駐紮要隘王文瑞仍駐永豐贛臨河道甚長戰船無

多適彭玉麟派喻俊明張瑞芳水師來援遂連檣上駛劉于潯亦添派戰船駛赴樟樹一帶藉資扼紮至省城兵力甚單臣飭護九江鎮總兵萬泰統兵千餘人來省以固根本重地咨請曾國藩酌派數營接防湖口並飛咨鮑超兼程來援上諭林彩新一股經王德榜等疊次痛剿殲滅殆盡林逆亦被水淹斃剿辦甚爲奮勇侍逆一股襲踞建昌之萬年橋以大股西渡分竄宜黃崇仁江忠朝席寶田等統軍繼進劉典王文瑞所部分駐臨江永豐彭玉麟所派之提督喻俊明等師船復跟蹤上駛與曾國藩前奏大略相同贛江以西諒可無虞竄渡惟此股賊匪著名兇悍尤宜厚集兵力痛加剿洗曾國藩前檄周寬世七營赴援並令鮑超一軍取道湖口九江繞出樟樹鎮迎頭遏擊著卽催令該提督等迅速前進與劉典王文瑞及江忠朝等追躡各營縱橫夾擊務將此股悍賊

就地殲除迅克宜崇各城毋任久踞一面嚴扼贛江之險杜其西竄以保完善省城兵力單薄沈葆楨檄萬泰等所部兵千餘入省咨請曾國藩酌派數營接防湖口要隘著曾國藩酌量調派陳炳汶汪海洋等股尙踞湖坊陳坊一帶著左宗棠飭令王開琳王德榜兩軍乘勝進剿毋任紛竄腹地致剿辦愈形棘手將此由六百里各諭令知之○諭熙麟奏剿辦甯夏回逆請派兵勇赴援秦州並請飭四川總督盤查滇匪各摺片甯夏滿城西門已開城外賊營全行撤退惟平羅賊勢仍未稍鬆顯係該逆聞大軍漸集復擬甘詞求撫緩我師期疊經諭令都興阿雷正綰慶昫等嚴密布置分路進剿著卽懷遵前旨迅速進兵會同埽蕩毋爲該逆所乘熙麟所稱如果逆匪實係畏罪投誠應先將甘心從逆之官犯王錫爵馬化澂訥忠赫文選彭慶章保立等連其家屬按名捆獻都興

阿營凌遲處死並令該逆等將所鑄槍礮及一切軍器馬匹盡數呈繳方可網開一面法外施仁等語逆回果能真心求撫如照熙麟所擬辦理有無後患著都興阿雷正綰慶昫酌度情形相機辦理慶陽糧臺需餉甚殷前令沈桂芬籌解銀三十萬兩並著文煜派員迎提催令分起解甘以濟要需閭敬銘籌撥甘餉一萬兩解赴陝西藩庫交納此項銀兩著劉蓉嚴飭藩司不得再行截畱卽與應解雷正綰軍營餉項一併解赴甘省毋得遲誤秦州所屬之秦安縣張家川蓮花城等處回匪蔓延勢甚危急平固甯靈失陷後蘭州大道梗阻專恃秦州一路爲赴省糧運要道關繫極爲緊要曹克忠一軍能否赴援著劉蓉另撥勁旅馳赴秦州協剿陝省如無兵可撥著雷正綰抽調兵勇兼顧秦州以通餉道平涼逆燄已衰惟每當接仗漸多兇悍叛徒聲音服飾均係雲南回類難民

朱元升亦供有雲南馬賊七百往攻鞏昌之語甘回旣與滇匪勾結如果源源踵至勢將不可收拾著熙麟文煜雷正綰檄飭毗連川陝等處各地方官務於入甘要隘嚴密盤查認真防堵著駱秉章確查甘肅通滇道路無論驛站大道偏僻小徑嚴飭地方官一體盤詰如有滇省回民及來歷不明之人卽行查明懲辦以靖匪蹤平涼屢戰皆捷極爲得手著雷正綰會同陶茂林等軍迅圖攻拔並將外來滇匪殄除淨盡毋畱遺孽將此由六百里各諭令知之○壬戌諭內閣國家命將出師剪除兇逆原期與吾民共樂昇平其甘心從賊者固爲法所難容而殲厥渠魁脅從罔治凡被賊倡脅而悔罪自新者皆在可矜可赦之列前經屢諭各路統兵大臣令於誠心歸順者無論從賊久暫均准一律投誠各該大臣亦能仰體朝廷好生之心妥爲辦理故大軍肅清蘇浙兩省收撫甚

多凡率眾來歸殺賊反正者類皆寬其既往咸與維新此被陷難民所當共聞共見見在金陵合圍指日可克若俟城池既拔則玉石俱焚雖悔何及亟宜及早省悟自覓生機惟念其開有久陷賊中隱懷疑懼未能自拔者用是再行剴諭嗣後如有設計獻城或擒斬首逆卽立予重賞其有從賊已久蓄髮較長但能誠心歸順均准薙髮免死給予牌照路費資遣回籍攜帶眷口貲財悉歸本人兵勇不得搶奪無籍可歸妥爲安置如私行殺害劫奪財物卽將該兵勇按照軍法從事並將該本管官從重懲辦各處投誠難民照此一律辦理著各路統兵大臣各省督撫卽將此旨刊刻張貼徧行曉諭務令身陷賊中者咸知朝廷寬大之政益以堅其向化之心用副覆幬生成之至意將此通諭知之○諭僧格林沁自上年督師攻拔山東淄川縣城埽平鳳凰山逆壘旋卽回軍皖北

殲除逆首苗沛霖肅清淮甸厥功甚偉本年髮捻各逆竄擾楚豫
交界該大臣親督所部兵勇轉戰而前所向克捷洵屬勦勞懋著
因念近日天氣炎蒸該大臣冒暑督兵不辭勞瘁允宜優加賞賚
以獎忠勤著發去黃紗馬褂料二件金表一對玉柄小刀一把火
鏹一把鼻煙一匣茶葉二匣派伯彥訥謨帖馳驛親齎前往軍營
交僧格林沁祇領並傳諭該大臣爲國宣勞尤宜善自愛護以隆
倚畀○諭議政王軍機大臣等富明阿奏軍務竣後請安插散勇
解散賊黨一摺據稱江浙等處散勇日多必須分數分起追繳器
械給貨派員管帶經過營縣彈壓遞送分交原籍地方官並於將
裁之先飭令各哨官詢明該勇原籍有業可歸有田可耕有親戚
可依倚者一一登注冊內將原冊發交地方官照冊妥辦其無業
無田無親戚者莫若寓安插之法於屯田之中蒙穎鳳泗之間曠

野荒田比比皆是江浙千餘里中間亦一片荒蕪若將皖北權鹽之利江浙算緡之利擴充勻撥作爲牛具籽種第一年免納捐課第二三年繳還借本第四年照常輸將酌中定議興屯卽以救時等語自來軍務將竣遣散勇丁不得其宜每滋後患若於屯田之中妥籌安插自可一舉兩得惟是有治法尤貴有治人著曾國藩左宗棠李鴻章喬松年吳棠嚴飭所屬悉心酌覈妥議章程派委賢能地方官實心經理不可意存畏難亦不得草率敷衍務令有條有理經久可行盡地之利以消患之萌方爲妥善至解散賊黨一節疊經明降諭旨寬其脅從但恐陷賊既久之人疑投誠必無生理賊遂因其疑而固結之以致垂破之城難於攻拔見在金陵城中逆黨尙多楚豫江西大股爲數亦眾因特再降諭旨著江浙等省各督撫統兵大臣於奉到此旨時刊刻謄黃剴切曉諭廣爲

播散或更設局以招撫之務在寬其格而予以自新堅從賊者反
正之心卽以破賊固結之計至賊渠狡猾或有假冒含混乘機生
變等事亦不可以不防惟在該督撫及統兵大臣等妥慎辦理以
靖地方將此由五百里各諭令知之○諭官文奏陝師未至賊勢
東趨見派各營合力截擊並移營孝感督剿一摺與僧格林沁昨
日所奏情形大略尙無歧異此股髮捻闖入楚疆經僧格林沁督
帶馬步於隨州兩戰大捷楚軍復分投截殺賊勢敗竄惟楚境北
路多山南路多水馬隊難於施展至德安黃孝之間地始平坦又
爲賊蹤中阻未能聚而殲旃僧格林沁昨奏有賊蹤東趨卽拔隊
迎剿該逆竄至淮北一出稻田馬隊卽可得力之語此時隨棗鍾
京天應雲孝安應各郡縣已無賊蹤全股趨重於黃陂以東黃安
麻城黃岡之間儻得馬隊勁兵迎頭截擊必可大挫兇鋒著該親

王偵探賊蹤相機妥辦官文見派成大吉楊朝林石清吉周鳳山各從黃陂麻城或迎頭截剿或跟蹤追擊並拔營至孝感一帶督剿卽著督飭成大吉等星夜跟追仍設法繞出賊前會合江皖各軍痛加剿洗毋令賊匪一意東趨又成尾追之勢至由陝調楚各軍除孟宗福黃金山等六營經穆圖善等酌陝防剿外其姜玉順藍斯明譚仁芳等所部各營業經分起由豫赴楚並著官文飛速催提酌量道路遠近飭令分投進兵毋稍延緩皖北接壤楚境六安首當其衝前據喬松年奏蔣凝學駐守六安共有六營並令王才秀所部駐三河尖接應其壽州定遠廬巢鳳一帶亦各派兵駐守見在賊蹤逼近防兵究嫌單薄著曾國藩喬松年妥籌布置酌量添調兵勇扼要防剿毋稍疏虞其陳國瑞英翰兩軍並著僧格林沁喬松年恪遵昨日諭旨飛速催令帶隊駐紮正陽探蹤迎擊

毋落後著富明阿仍遵前旨酌撥江北勁旅扼紮上游以資協勦
徐宿清淮一帶夙爲捻匪出沒之所難保不聞賊警又萌反側著
吳棠隨時鎮撫加意籌防以期有備無患逆竄光羅一帶商城固
始均屬喫緊張之萬當催令張曜等會合僧格林沁之軍相機勦
辦唐訓方已抵署任武昌等處防守事宜並著嚴密妥籌以防賊
匪回竄不得稍涉大意將此由六百里諭知僧格林沁官文曾國
藩富明阿吳棠喬松年張之萬並傳諭唐訓方知之○癸亥諭內
閣朕奉 慈安皇太后 慈禧皇太后懿旨從來致治之源端在
以古爲鑑凡用人行政之要治亂得失之源載在簡編足資法戒
前於皇帝御極之初命南書房尙書房諸臣採擇前史事蹟纂輯
成書進呈備覽賜名治平寶鑑其中採據往事推闡敷陳尙稱切
要若將此書講貫發明於治理尤有裨益著瑞常寶鋆載齡李棠

階單懋謙徐桐於本月二十七日起每日輪派一人由議政王帶領進講瑞常等於進講之時務當剴切敷陳言必盡意毋得稍有避忌用副集思廣益至意○諭議政王軍機大臣等前據王明等奏滾地雷王五餘黨被擊潛匿請酌撤官兵以節經費當經降旨允准仍著王明等嚴飭奉天吉林兩省實力躡緝茲據景綸等奏稱餘匪烏痣李等在東邊圍場藏匿復由山徑竄出百餘人在通溝岡子等處行劫經官兵追擊斃賊多名該將軍復派令署副都統德英等管帶兵役練勇設法殄除疊有斬擒追至佈爾庫邊門該匪向昌圖偏臉城逃竄另股匪徒在奉天屬界圍場等處滋擾各等語首逆王五餘黨被剿潛匿旋復聚眾滋事亟宜認真勦洗以絕亂萌著王明寶善寶珣德椿景綸瑞嚴飭該省帶兵將弁無分畛域實力掩捕不准一名漏網將此由四百里各諭令知之

○諭徐宗幹奏髮逆復陷建甯甯化縣城旋即擊退見飭各軍妥籌防守一摺建甯甯化兩城南經收復何以賊匪回竄又復失陷徐宗幹於軍務重事毫無布置派出各員又復不能得力致賊氛一至城卽被陷以萬餘兵勇各路分防而任賊往來自如曾不能一爲堵截乃以被賊襲入隨即擊退爲詞請將該文武等免議如此辦事顛預安能整頓戎行保守疆圉徐宗幹著傳旨申飭所請將文武各員免其置議之處著不准行仍著該撫查明失事各員嚴參懲辦不得再有粉飾自取罪戾此股賊匪向江西新城石城竄去難保不去而復來徐宗幹當嚴飭徐曉峰張啟煊等實力堵禦如再被賊闌入蹂躪地方該撫等恐不能當此重咎也浦城汀州等處關隘甚多以分防見單前經諭令該撫檄調曾玉明林文察等帶兵內渡併力勦賊卽著催令該員等會同江省兵勇合力

兜剿不得再有遲滯康國器一軍計日可到仍著飛催前進見在
閩省防剿正當喫緊之時毛鴻賓郭嵩燾當懷遵疊次諭旨迅飭
張運蘭督帶所部剋日赴閩毋許逗遛徐宗幹當會商左宗棠就
見有兵力嚴密防堵或分兵出境會剿均當認真籌辦毋得再誤
事機將此由六百里各諭令知之○諭張之萬奏官軍剿辦髮逆
克復宣化鎮見飭各軍赴楚會剿一摺前因髮逆竄至豫東疊經
諭令張之萬妥籌防剿見在宣化鎮賊巢雖經副將徐連陞等攻
克而賊蹤仍在光羅境內必應乘勝痛剿張之萬見飭色爾固善
張曜等統帶馬步各營馳援東路所辦甚合機宜卽著督飭該副
都統總兵等迅速馳抵光羅一帶會合楚軍認真剿辦以收聚殲
之效欽此梁成富一股前據穆圖善劉蓉奏該逆竄出大峪口偏
近西安請留孟宗福等六營助剿等語迄今已逾旬日尙未將陝

軍接仗情形馳奏此次張之萬摺內所稱探聞梁成富一股游駛商州境內與浙川相距不遠之語是此股匪徒業由西安回竄張之萬已派副將張士元等駐浙嚴防並著穆圖善劉蓉德興阿迅速派兵追擊兩面夾攻毋令賊蹤竄逸致成蔓延將此由六百里各諭令知之○諭前因勞崇光奏確查滇省實情擬以回攻回責成馬如龍岑毓英剿除杜馬各逆當經諭令勞崇光賈洪詔會商妥辦茲據賈洪詔奏勞崇光以回攻回之舉有六不可從刻下川省軍務稍鬆正擬籌商進兵惟與勞崇光意見歧異萬難共事等語從前勞崇光所陳各節原不過一時權宜俟兵力較足仍須分別勦辦方竟全功原不能聽其一意辦撫遽謂可以了事此次賈洪詔所陳進兵勦回等情未嘗不義正詞嚴理直氣壯但滇省糜爛至此亦非紙上空談所能濟事且籌兵籌餉仍須藉川省之力

見在黔匪侵犯川疆劉嶽昭一軍亦經該督奏畱暫駐合江江津不能卽赴昭通竊恐川省兵力尙難兼顧駱秉章老成持重素能統籌全局不分畛域且距滇較近該處實情必有所聞賈洪詔擬辦各節是否能有把握進兵之後川省資助餉項能否源源不斷著駱秉章體察情形酌覈具奏賈洪詔與勞崇光同任封圻必須和衷協力方能共濟乃意見齟齬至於如此以後諸事掣肘貽誤非輕賈洪詔與該督近在一城其人才識如何能否勝此重寄並著該督據實密陳毋稍隱飾將此由五百里諭令知之○以安徽蒙城解圍追賄已故知縣龔澍道銜並建祠○予福建陣亡縣丞董鍾麟等祭葬世職○甲子諭議政王軍機大臣等李鴻章奏官軍分剿湖州攻克吳淞等處水陸進攻長興並請俟湖郡克復再行協剿金陵各摺片僞立王黃汶英等糾眾竄踞吳淞擾及陸家

灣一帶道員潘鼎新等派撥隊伍敗賊於丁公橋等處復分道猛攻將吳淞賊卡賊壘力戰攻毀其李朝斌進攻長興水師壘破夾浦口堅壘郭松林等陸營復將東門外上華橋等處賊卡埽平偏紮城下勦辦甚爲得手湖郡賊勢甚重左宗棠進剿之師尙未偏城此次該逆大股出撲希圖直犯南潯震澤以掣浙軍後路並擾蘇防逆謀甚狡李鴻章務飭水陸各營互相犄角毋爲該逆所乘一面飭李朝斌郭松林等合力猛攻迅將長興縣城克復克城後酌量派兵駐守卽飭諸軍乘勝會合浙師迅拔湖州盡殲醜類惟兩省共辦一事誠恐所部將領各存意見忌功避嫌均所不免見當全浙漸就肅清之際湖州一城已成孤注而悍賊麇集尤須各軍併力迅圖蕺事左宗棠李鴻章務各分飭各營將士同心協力早拔名城一俟大功告竣蘇浙官軍皆當同膺懋賞也前諭李鴻

章派撥勁旅協剿金陵茲覽該撫所奏以滬軍協攻湖郡分防句容東壩高淳溧水等處兵力難分常勝軍及程學啟所遺礮隊並劉銘傳礮隊或派往長興或訓練未成均難助剿自係實情惟金陵功在垂成城大而堅未易猝拔曾國荃所掘地道前次攻破月圍復爲該逆堵築非添集得力礮隊勢難早奏膚功仍著李鴻章督飭各軍趕緊操練多製炸彈廣儲攻具一有成效卽飭迅赴金陵協同進剿以藏全功該撫能否親往金陵之處屆時再行酌量辦理將此由六百里各諭令知之○諭聞敬銘奏周厯各屬察看情形籌辦善後一摺所稱沿途情形沂屬田多荒廢兗屬次之曹屬又次之各屬民情以曹州爲難治沂衰次之目前惟安撫災黎借給牛具籽種最爲要著擬卽籌款迅速辦理等語覽該撫所奏各節於時事均屬切要著卽督飭地方官認真經理不可有名無

實白蓮池地面既據奏稱不甚寬廣擬將縣丞一缺並界河汎干
總一缺一併移設白蓮池藉資彈壓著照所議辦理濮州一城當
黃水之衝該撫見擬遷徙於舊城乾涸處所並修築金隄以禦北
流著卽派委妥員俟伏汎一過卽行妥籌興辦另片奏接奉批諭
詳陳東省吏治大概情形所論亦屬透徹安民必先察吏欲恤民
之疾苦先戒官之貪欺而又必先使爲廉吏者不至賠累俾中材
皆知效法吏治方克振興該撫既知吏治敗壞之原於營私粉飾
之吏務卽隨時嚴參以期淘汰淨盡其尙知自愛賠累難支者卽
不妨酌量調劑使人人樂爲循吏以成大法小廉之治知之匪艱
行之維艱日計不足月計有餘該撫於一切應行變通各事宜務
須實心實力次第愼勉爲之以副委任將此諭令知之○諭劉蓉
奏滇髮兩逆被勦奔竄剋期出省陳得才一股敗回鄂境隴防官

軍勦賊獲勝各摺片蔡逆勾通髮逆由子午鎮灃河竄踞鄠縣西南兩關另股西竄之賊與該逆合股經澇峪口遁入盤屋之祖菴被官軍追殺賊竄終南鎮及田峪口慈峪口等處劉蓉見飭英毅六營會同黃鼎趨鄠縣繞出賊前蕭慶高趨鄠縣躡賊之後穆圖善潼關折回之後起六營由盤屋前進著卽嚴檄派出各軍分路進攻痛加掃蕩以收聚殲之效昨據張之萬奏僞啟王梁成富一股遊駛商州境內與浙川相距不遠茲據劉蓉奏僞扶王陳得才與啟逆合股已至鎮安經官軍擊敗回竄鄂境等語此次竄鄂之賊究係何股與張之萬所奏殊出兩歧著劉蓉查明迅速具奏匪蹤剽疾異常難保不由漢隄川著李雲麟統率所部進駐漢中分扼華陽佛坪留壩各要隘力遏該逆竄川之路毋得稍有疏失劉蓉見已出省所有西安一帶戰守事宜著穆圖善德興阿劉蓉妥

籌辦理曹克忠一軍既據劉蓉奏萬難抽動卽著照該撫所請飭令馳赴鳳翔一帶兼顧汧隴扼要駐紮毋庸調赴都興阿軍營陝省應解工程銀十五萬兩見在需用甚殷若非源源報解恐有停工待餉之虞著劉蓉督飭藩司趕緊設法陸續撥解將此由六百里各諭令知之○申諭各省慎選孝廉方正○乙丑諭議政王軍機大臣等本日據議政王文祥寶鋆呈遞接到德木楚克札布信函內稱接本旗稟報去年十月起至今紅鬍子賊匪成羣搶奪並綁出台吉披甲人等數十名當卽派令旗員太平社首人等查拏匪徒與賊交仗打死賊匪三名前後生擒十名本欲解縣究辦恐餘匪勾串路劫見將人犯在旗看管並將案情咨達熱河都統惟無力解送可否恭摺具奏請旨或如何辦理之處示知等語賊匪滋擾蒙古地方肆意搶奪戕害性命綁去台吉人等數十名之多

實屬不成事體著麒慶卽飭地方文武會同該王旗設法拏辦以靖奸宄德木楚克札布所派旗員社首擒拏匪犯十名自應徑解熱河都統究辦惟長途遠解恐被劫奪亦屬實情著麒慶卽派得力兵弁赴該旗地方提取各犯督同府縣嚴訊按例懲辦並追究黨與一體查拏勿稍寬縱如吏胥人等有刁難勒索等弊並須認真禁止德木楚克札布信函一件著鈔給閱看將此諭令知之○予江蘇陣亡總兵官張遇春遊擊靳春和祭葬世職○丙寅諭議政王軍機大臣等喬松年奏楚境竄賊漸偏皖省派隊駐守六安並暫留馬隊以資防剿暨籌議裁汰鋪兵皖北開徵各摺片前因楚北賊勢東趨六安等處防兵較單曾經諭令添調兵勇扼要防剿其陳國瑞一軍卽令駐紮正陽以資扼守見在髮捻各逆竄擾黃陂黃安等處麻城一帶亦見賊蹤該處皆距英霍不遠喬松年

已飭陳國瑞所派之郭寶昌馳赴六安會同蔣凝學協力防剿兼顧英霍所籌尙妥著卽督飭派出各軍認真堵剿儻逆蹤竄近英霍務須合力截擊以剿爲防毋令東竄一步並著催令陳國瑞迅速前進或紮英霍或紮六安擇要駐防妥籌調度以遏逆氛陳飛熊一軍著催提到防以厚兵力鎮營兵勇旣恐不能得力卽著咨商曾國藩辦理克蒙額馬隊旣據喬松年稱其強壯可用著准其暫畱臨淮俟常星阿馬隊到後再行調回揚營駐紮臨鳳等處各隊著督令逐日訓練以備不虞毋稍疏懈鋪兵接遞文報一節請俟軍務大定再將能否永遠裁汰之處妥議辦理卽著照該撫所議行惟前任山西巡撫恆春裁汰鋪兵之奏事隔多年何以至唐訓方任內始奉部文通行其因何遲延之處並著查明具奏皖北各州縣開徵者已有十屬國家惟正之供誠能取之而不爲虐小

民諒必鼓舞輸將但百姓復業未久尙須加意撫恤培養元氣務須釐定章程嚴飭各州縣痛裁浮費於國計民生兩無妨礙方爲妥善將此由六百里諭令知之○諭穆圖善奏賊匪被剿西竄帶兵出省剿辦李雲麟奏西安省城喫緊統兵進援各摺片昨據劉蓉奏蔡逆髮逆竄踞郾縣之西南兩關另股西竄之賊復與該逆合股遁入藍屋之祖菴被官軍擊敗賊竄終南鎮及田峪口慈峪口等處當經諭令穆圖善等實力防剿見在湘果諸軍陸續趕到業經劉蓉督帶出省親赴西路剿賊穆圖善亦擬卽日出省會督金順馬隊併力攻擊卽著穆圖善劉蓉相機會剿迅殄狂氛省城防守事宜仍著德興阿督同在城文武嚴密布置不可稍有鬆勁曹克忠適因在省商令會同剿賊該總兵之軍見在何員統帶能否得力如必須該總兵親自在彼統帶卽著該總兵仍行回願鳳

翔汧隴毋令回匪乘虛復熾李雲麟勦辦蔡逆一股前據劉蓉奏稱該京卿指畫輿圖謂此股可期必滅見在該逆西趨兇燄甚熾李雲麟又以沿途無糧未能追躡爲詞可見從前已入彀中之說不過紙上空談毫無把握此時穆圖善劉蓉已出省追勦省防情形稍鬆李雲麟一軍如再前赴西安則興漢一帶空虛恐該逆乘間回竄窺伺川疆李雲麟著仍遵前旨進駐漢中分扼華陽佛坪畱壩各要隘力遏逆匪竄川之路該京卿既貽誤於前儻再不奮勉圖功致令此股賊匪旁竄紛趨自問當得何罪澄漢等水師據奏尙爲得力惟見在賊氛並未殲滅豈能遽予獎勵李雲麟所陳水師人員出力之處著俟陝省肅清咨商劉蓉覈實請獎將此由六百里各諭令知之○諭德勒克多爾濟等奏籌商防勦並桂成所部擬取道晉省馳往會剿一摺前因甯夏滿城被圍日久諭令

桂成統帶勁兵會合阿拉善王部下出甯夏北山相機進剿茲據德勒克多爾濟等奏稱查自歸化城土默特游牧由口外草地馳赴阿拉善旗相距二千里地多沙漠水草缺乏若帶兵由此行走不惟柴薪無處採覓駝馬亦難牧放桂成見帶精兵四五百名擬由晉省取道馳赴都興阿軍營聽候酌撥等語所奏自係實在情形桂成所部官軍卽著取道晉省迅速前赴都興阿軍營到營後應由何路進剿著聽候都興阿節制調遣歸綏本處之防亦關緊要桂成挑帶官兵僅止四五百名其餘自可畱爲操防之用據奏設有緩急大同鎮兵尙可就近檄調毋庸再調都興阿訥欽之兵著照所議辦理所有沿邊沿河防堵事宜仍著德勒克多爾濟嚴飭帶兵將弁隨時偵探實力嚴防毋稍疏懈將此由六百里各諭令知之○丁卯諭內閣熙麟雷正綰奏官軍克復平涼府城擒斬

巨逆一摺甘肅平涼府城自被回匪竄踞後雷正綰督軍進攻疊次獲勝會同陶茂林之師兩路逼城逆眾併力抗拒官軍奮勇由西北登城守賊潰亂復豫空地道轟塌東南城隅大隊先後擁入賊占西北拌死巷戰我軍縱橫衝擊鏖戰兩日將城中悍賊一律掃除並將著名巨逆鐵酉羽輕材殲斃剿辦極爲得手雷正綰自督軍入甘埽平靈臺崇信黨原北原及白水局見新城等城鎮卓著戰功此次復督隊攻克平涼剿除巨逆實堪嘉尙雷正綰著加恩賞穿黃馬褂並發去白玉四喜搬指一箇白玉翎管一枝大荷包一對小荷包兩箇交該署提督祇領陶茂林會同雷正綰分路進攻躬冒矢石立拔堅城甚屬奮勇陶茂林著加恩賞穿黃馬褂以示優獎○諭議政王軍機大臣等熙麟雷正綰奏官軍克復平涼府城一摺平涼爲自蘭州通陝要道逆回負隅抗拒久肆鴟張

經雷正綰督率兵勇節節剿洗復會同陶茂林相機攻剿迅拔堅城實屬調度有方深堪嘉尚該提督見因蓮花城張家川兩賊巢尚在拒守擬偕陶茂林分路兜剿所籌甚合機宜卽著乘勝進擣迅將蓮花城張家川匪巢攻拔並將西路各逆壘一律掃蕩先願蘭州省垣根本重地以次肅清隆靜規復固原直抵甯靈毋得稍有鬆動見在平涼已復雷正綰等軍鼓行而西自能所向克捷第敗匪西遁難保不因甯夏援兵未集麇聚一方希圖逞志著都興阿迅速前赴定邊催督各軍規取靈州以通援甯之路訥欽已抵花馬池近日接仗能否得力並著酌量調派桂成到營後應如何調遣之處著仍遵昨日諭旨辦理慶昫常陞尤當加意防守慎益加慎以待援師不可稍涉大意熙麟另摺奏請飭催四川等省協餉已寄諭駱秉章等迅解矣此時熙麟業經開缺所有慶陽軍營

糧餉及雷正綰等軍餉需著文煜妥籌轉運毋稍缺乏將此由六百里各諭令知之○諭閩敬銘等迅解陳國瑞營餉暨甘肅協餉○予江蘇殉難典史張垞等祭葬世職○戊辰諭議政王軍機大臣等前因劉長佑奏邊牆地方遼闊請飭嚴查奸宄諭令麒慶等認真拏辦茲據麒慶奏稱查禁之法務須不分畛域口外地方遼闊盜賊竊發往往鞭長莫及請飭協力兜拏以靖地方等語邊外地皆空曠此拏彼竄自係該匪慣技若非各該地方官同心搜捕則互相諉卸盜賊仍得來去自如殊非整飭捕務之道萬青藜卞寶第麒慶阿克敦布德勒克多爾濟劉長佑沈桂芬成慶春連成嚴飭所屬官兵於邊牆內外一帶聯絡聲勢互相巡緝一處有賊則附近該處之地方官卽當會同查拏務獲究辦毋得稍分畛域此外尙有沿邊應防處所並著劉長佑沈桂芬查明地界咨會各

該地方官協同緝捕一體防範以清盜源麟慶所稱回民雜處中國久已相安若以句結甘肅叛回爲疑豫相逆億是猜嫌先啟於上官恐非開誠布公潛消反側之道等語所奏不爲無見應如何不動聲色暗中嚴防之處著萬青藜卞寶第麟慶阿克敦布德勒克多爾濟劉長佑沈桂芬成慶春連成安籌辦理將此各諭令知之○諭曾國藩奏遵旨會師籌剿金陵一摺據稱自蘇常攻克之後本擬咨請李鴻章親來會剿惟以封疆將帥之臣值苦戰積勞之際未敢奏調金陵兩月以來百計環攻偪城太近賊以洋槍狙擊我軍傷亡至四千餘人之多所挖地道亦難奏效賊糧仍可支持數月曾國荃積勞成疾飲食漸減餉項奇窘尤爲可慮該大臣已咨調郭松林劉銘傳酌帶開花礮位輔以洋槍隊就近助攻請飭催李鴻章速赴金陵俟北岸軍事稍鬆於六月親赴金陵籌商

攻剿等語具見視國如家不分畛域之意前據李鴻章奏滬軍協
攻湖郡兵力難分擬添配礮位操練兩月俟湖郡克復再行協攻
金陵當經諭令該撫督飭各軍趕緊操練一有成效卽迅赴金陵
著仍遵前旨認真操練多製火器攻具並於所部各營內挑選精
壯便捷善於攻城者二三千人卽交劉銘傳等帶赴金陵其郭松
林一軍見在助攻長興能否撥往並著李鴻章酌度調派長興一
城最關緊要如能卽日克復蘇省防務自可稍鬆該撫或俟長興
得手後統率諸軍助攻金陵不必定俟湖州克復左宗棠自入浙
以來戰勝攻取確有把握吳興一郡諒不難剋日攻拔著卽督飭
諸軍設法攻克務須就地殄除勿任窮蹙他竄楚賊刻思東犯英
霍一帶已覺喫緊去安慶不遠該大臣自未可輕離根本之地著
俟上游軍勢漸平卽赴金陵督師俾各路將帥有所稟承以蒞全

功金陵餉絀前諭李鴻章將輪船經費五十萬兩解赴大營據奏已解金陵大營規平十五萬兩解鮑超營四萬兩又解曾國藩營四萬八千餘兩其餘約二十六萬餘兩趕緊飭催儘解安慶大營此項銀兩曾國藩何時收到卽行查奏其餘銀兩著李鴻章認真催提陸續解往用收飽騰之效曾國荃積勞致疾聞之深爲厯念兒在大暑炎蒸該大臣務卽傳知該撫善爲調攝金陵城大而堅賊悍且眾困獸之鬪不可不防惟當密屬該撫拊循士卒兼須整飭營規嚴防竄突先爲不可勝以待敵之可勝不可稍涉大意將此由六百里各諭令知之○諭總理各國事務衙門奏丹國換約屆期請派員互換一摺丹國前立條約聲明以一年爲期或在天津或在上海互換茲屆換約之期據英國駐京公使威安瑪呈遞照會內稱丹國見派水師副提督璧勒前來不日到滬請派員互

換等語著派提督銜李恆嵩會同布政使劉卮膏將上年與丹國所立條約妥爲互換卽由李鴻章諭知遵辦其條約各本著俟崇厚派員齎送至滬時卽交李恆嵩等祇領辦理李鴻章於一切事宜並著會同商榷以臻妥協並令軍機處將寄諭摘錄一併發往如該使向李恆嵩等索看憑據卽可給予閱看俟換約事畢此旨仍繳還軍機處備查將此諭令知之○己巳諭議政王軍機大臣等喬松年奏陳國瑞一軍催令赴防鎮防餘兵約擬撤遣請添調揚防馬隊助剿一招陳國瑞一軍業於五月十九日由徐州啟程見在諒已行抵臨淮著喬松年與之會商並稟商僧格林沁酌度地方緩急何路緊要卽飛飭該總兵扼要實力防剿該撫仍當隨時督飭並令各軍與之聯絡聲勢以期周密一面將賊情偵探飛咨僧格林沁以便該大臣赴皖督剿鎮營兵勇四千人旣經該撫

與曾國藩咨商恐其不能得力卽著馮子材魁玉妥爲裁撤惟不可令其羣聚一處致生事端若散遣不得其法致貽後日地方之患定惟馮子材等是問前令富明阿酌撥江北勁兵豫備援應皖北若有警信非馬隊不能得力記名副都統富陞素稱勇敢所部馬隊亦皆精銳著富明阿卽派該副都統督帶所部馬隊馳赴臨淮一帶與克蒙額合紮一處見在楚賊東竄斷不能越皖境而至揚州是揚防鬆而皖防急該將軍卽趕緊調撥不得稍存畛域之見俟皖防無事再行調回揚營可也將此由五百里各諭令知之○諭張凱嵩奏官軍攻克貴縣逆巢潯州肅清擬進兵分徇南甯思恩等處各摺片廣西軍務兩年以來疊平巨寇此次黃三敗踞平天寨復經劉坤一等進克堅巢擒獲首逆辦理甚爲得手黃逆倡亂十年潯境久遭荼毒見在巨憝就殄全股蕩平地方善後事

宜亟須妥爲籌畫該撫以左江所屬鄰氛土寇事尙糾紛右江之思恩地方伏莽未淨擬將貴縣水陸各軍分爲三起以一軍駐潯彈壓一軍上溯南甯一軍分徇思恩所籌尙屬妥協卽著督飭潯州文武會同駐潯官軍將搜捕餘匪撫綏殘黎各事細心經理一面飭令劉坤一仍卽出省督軍將思恩南甯等處伏莽分別良莠剿除淨盡此時先聲所播摧枯拉朽自易爲功但須除惡務盡毋得稍畱遺孽以期全境乂安廓清邊圉將此由六百里諭令知之○以官軍復廣西貴縣城平潯州逆匪賞張凱嵩頭品頂帶布政使劉坤一等獎敘有差